

Karaloukta

namüin na Anoujashii

HEBREOKANA

Nia alana'aleeka ma'i chi
Nüchonkai Maleiwa

noulia na aapieekana

1 ¹Sümaiwa paala, aashajaashi chi Maleiwakai wainmatua namaa na watuushikana nakajee na nünüikimaajanakana sulu'u naata'awain sukuaippa nüsouktia. ²Otta müsia joolu'u mapainka, aashajaashi wamüin nukajee Jesucristo chi Nüchonkai, chi nüneekakai süpüla naapaa amüin kasakat süpüshua, chi nukumajakai akajee tü mmakat sümaiwa paala je tü jolotsükalüürua süpüshua. ³Je sütüma nünüiki chi Nüchonkai, kato'ulu tü kasakalüürua süpüshua yaa mmolu'u je chaa iipünaa süka nuluwataain süna'in pülashaatain ma'i nia. Müshi aka ma'i nia naa'in chi Nüshikai süna'in wanaawain nukuaippa nümaa je süna'in anashaatain ma'i nia. Je süchikijee nüla'ajaain waainjala woulia, o'unüshi cha'aya iipünaamüin süpüla joyotüinjachin nia nikialu'ujee chi Maleiwa Pülashikai süka kojutüin ma'i nia nütüma. ⁴Kojutuleeshia ma'i nia noulia

na aapiee nüma'anajeejanakana Maleiwa, maa aka tü nüntülia “Tachon” makat, e'itaanakat nütüma chi Nüshikai, süna'in anale'ein ma'i sulia nanülia na aapieekana. ⁵Je tü pütchi:

“Pia Tachonka'aya.

Süpüla ka'i tüü, te'itaan pia su'upala wayuu süpüshua'a süpüla puluwataainjachin saa'u süka piain Tachoin”, münakat paala nütüma chi Maleiwakai, nnojotsü münüürüin nümüin wane aapiee. Maa'aya aka tüü:

“Pia'a Tachonkai,

otta tayakai, taya'aya Püshikai”, nnojotsü ein aapiee münakat amüin. ⁶Je chi Maleiwakai süna'in nüntirüin chi Nüchon e'irumaakai sa'akamüin wayuu, müshi nia:

“Anakaja müleka nasapainyo'ukale na aapieekana napüshua nümülatu'u chi Tachonkai süna'in na'waajüin nia”.

⁷Je müsü nünüiki Maleiwa noo'opünaa na aapieekana:

“A'yataashii naya tamüin süna'in müin aka naya tatüma saa'in jouktai oo'ulaka suwarala siki”.

⁸Otta nünüiki nüchiki chi Nüchonkai, müsü:

“Aluwataajeechi pia süpüla ka'ikat süpüshua süka piain Maleiwain wanaa tamaa.

Paa'inreerü tü anasukat waneepia sümüin tü wayuu puluwataakalüürua,

⁹ je püchekeerü süpüleerua shiakalüüruaya saa'inrüinjatüin tü anasukat. Müleka saa'inrüle tü mojusükot, pülerajeerü tia.

Je sünainjee tia, kojutshi pia noulia na pümaajanakana tatüma tayakai chi Pümaleiwasekai.

Je joolu'u, süka taneeküin pia süpüla puluwataainjachin, talatüsü ma'i paa'in”.

¹⁰Otta wane pütchiya, nünüiki chi Maleiwakai nüchikimaa chi Nüchonkai:

“Senyotkalee, pi'itaala paala sümäiwa tü mmakat nnojolüüwa'aya kasain eenin, je pükumajüin süka pajapü tü jolotsükalüürua chakat iipünaa.

¹¹ Mayaasüje'e amülouleerüin shia so'uweena wane ka'i, maa aka sututüin wane kuluulu, ayateechi pia waneepia.

¹² Pükolochijaweerü tü mmakat oo'ulaka tü jolotsükalüürua süpüla pujutüinjatüin shia. Pii'irateerü shia maa aka nii'iranaajaan nüshe'in wane wayuu yarüttapa shia.

Alu'usa piakai, müichia nnojolin ee'iratüin.

Kateechi o'u pia süpüla ka'ikat süpüshua”.

¹³Je tü pütchi,

“Püikkalaapa puluwataaiwa yaa tekialu'ujee

süka kojutüin pia tatüma”, münakat paala nütüma Maleiwa, nnojotsü münuushin nümüin wane aapiee, nia nümaka amüin chi Nüchonkai.

“Yaajeechi pia joyotüin ta'ütpa'a süma'inru'u takanajüin süpüshua tü pü'ünüükalüürua”,

müshi nümüin. ¹⁴Soto jaa'in tü saa'inrakat tü aapieekalüürua.

Ja'itaina nnojoliin wayuuin naya, a'yataashii naya waneepia nümüin chi Maleiwakai je aluwataanüshii naya nütüma süpüla nakaaliijüinjanain na wayuu o'tte'en nünjanakana.

Achiajaanaa suulia sheemiaja'alaain naalin chi O'tte'erüikai

2 ¹Je joolu'u saa'u süküjünüitpain nünüiki chi Maleiwakai wamüin nütüma chi Nüchonkai, taso'irüin jaa'in sünain jüüjüünjatüin jikii sünain tü pütchi jaapiitpakat, suulia sheemiaja'alaain naalin Cristo, chi O'tte'erüikai, jütüma. ²Soto jaa'in sünain kasalajanapü'üin nümüin chi wayuu eekai niyouktüin tü pütchi shiimüin aküjünakat paala sümüin wayuu süpüshua natüma na aapieekana. Süsalashii süka moonooiin naya sümaa tü nuluwataakat anain Maleiwa. ³Müshi'iya wayakana wapiushua maa'ulu yaa. Kasalajaneerü wamüin we'rala wayümüin müleka wayouktüle tü pütchi wo'tte'ennajatkat aka. Jülüja jaa'in tü naa'inrakat chi Maleiwakai süpüla nu'tte'erüinjanain waya nükajee Cristo. Anashaataleesia ma'ia tia. Aküjüna achikit palajana paala nütüma chi Senyotkai Jesucristo.

Je na wayuu aapakana nünüiki, naküjain nüchiki wamüin sünnain shiimüin ma'i. ⁴Je nii'iyatüin shia wamüin chi Maleiwakai sünnain shiimüin tü pütchikat saa'ujee tü kasa anashaatasü naa'inrakat na aküjakana wamüin nüchiki Cristo, tü nütüjakat apüleerua Maleiwa ne'e nümüiwa. Je tü kasa anasü naa'inrakat na wayuukana, naa'inrüin shii'iree sünnoujainjatüin tü wayuukolüirua nünain Cristo. Je watüjaa aa'ut shia sünnain shiimüin saa'ujee tü kasa anasü naa'inrakat chi Naa'inkai Maleiwa sünnain nükaaliijain waya anoujashiikana wane'ewai wakua sünnain a'yatawaa nümüin Maleiwa.

Ke'irukuichipa Jesús maa aka wayuu

⁵Tashajüin joolu'u jümüin süchiki jamüinjatüin tü mmakat so'uweena wane ka'i. Na aneekuushikana nütüma Maleiwa süpüla naluwataainjanain saa'u tü kasakat süpüshua so'u ka'ikat tia, nnojoliishii nayain na aapieekana. Nayainjana na wayuukana. ⁶Ashajünüsü süchiki wayuu sulu'u tü karaloukta nüchikimaajatkat chi Maleiwakai:

“Maleiwakalee, ponosü ma'i waa'in süka jülüjain waya paa'in.

Ja'itaina wayuüin ne'e waya, aa'inmajünüshii waya waneepia pütüma.

⁷Alanaashii paala sünnain aluwatawaa pütüma motso'o na aapieekana woulia, je joolu'u, kojutuleeshi'iya ma'i waya pütüma noulia sümaa anain ma'i pünüiki wamüin.

⁸Je püneeküin waya süpüla sülaülainjanain kasa süpüshua sainküin mma”.

Shiimüin sünnain süneekünüin paala tü wayuukolüirua süpüla

suluwataainjatüin mapeena saa'u kasakat süpüshua. Akaajasa maa'utpünaa yaa, nnojoyülia we'rüin sünnain suluwataain saa'u kasa süpüshua. Otta müsia so'uweena wane ka'i, shiimüin sünnain suluwataainjatüin. Nnojoleerü eekai maluwataajjuuin aa'u natüma. ⁹Mayaastüje nnojoyüliain suluwataain wayuu saa'u kasa süpüshua maa'ulu yaa, watüjaa aa'uchi Jesús sünnain kojutuleeichipain nia noulialee na aapieekana nütüma Maleiwa saa'ujee naapajiraain nikii süpüla ouktaa, mayaashiije alanaain paala na aapieekana nuulia motso'o. Je süka ouktüin nia saa'u saainjala wayuu, nnojoleerü aapünüin shikii süpüla ouktaa, nümüliajeerü chi Maleiwakai.

¹⁰Tü müliaa nülatirakat Jesús, süpülaajatü shiketiajüin tü nüchekakat chi Maleiwakai nüpüleerua sünnain nu'tte'erüinjatüin wayuu. Kee'ireeka naa'in chi Maleiwakai, shia suluwataainjatüin wayuu wainma wanaa nümaa cha'aya iipünaa so'uweena wane ka'i. Nia kakumalaka tü kasakat süpüshua süpüla nu'waajününinjachin waneepia sütüma wayuu. ¹¹Je nnojoiishi japülin Jesús süka tü wayuu o'ttaasükalüirua. “Naya na tawalayuukana”, müshi Jesús namüin, süka nakatannüin nütüma sulia naainjala süpüla nayainjanain nüpüshin chi Maleiwakai wanaa nümaa. ¹²Shia tü ashajünakat paala noo'opünaa sünnain maa:

“Maleiwakalee, taküjeerü namüin na tawalayuukana süchiki süpüshua tü paa'inrakat sümaa ta'waajeechin pia no'upala wanaa sümaa jutkatüin naya”.

¹³Otta müsia nünüiki namüin na nuwalayuukana:

“Nieechi chi Maleiwakai tanoujaka anain waneepia”.

Otta müsia nünüiki nüchikua nümüin chi Nüshikai:

“Anii taya namaa na püpüshi pi'itaakana tajapulu'u süpüla taa'inmajüin”.

¹⁴Otta müshia Jesús, aapajiraashi nikii süpüla ouktaa süpüla nukanajüinjachin chi Yolujaakai, chi eimolojookai wayuu seema ouktaa. Ke'irukuichipa Jesús maa aka shi'iruku wayuu. Wayuukalaka nia ¹⁵süpüla taashinjanain nütüma na wayuu süchepchiakana waneepia tü mmoluukat seema ouktaa, sükajee ouktüin nia saa'u saainjala. ¹⁶Tü nükaaliijüinjatkat Jesús, nnojotsü shiainjatüin tü aapieekalüirua, shiainjatü tü wayuu nuu'uliwo'ukalüirua Abraham. ¹⁷Süpüla nükaaliijüinjatüin shia, acheküsü ni'rüinjatüin tü müliaakat maa aka wayuu süpüshua. Sünain wayuuin nia, a'yataashi nümüin chi Maleiwakai maa'ulu yaa. Je saa'ujee niain chi sacerdote mülo'ushikai, naa'inrüin waneepia tü nüchekakat Maleiwa nüpüleerua. Nuuntüin nümliajüinjatüin tü wayuukolüirua süpüshua sükajee naapajiraain nikii süpüla ouktaa saa'u saainjala süpüla anajiraainjatüin shia nümaa chi Maleiwakai. ¹⁸Je sünain wayuuin Jesús, sümaa nülatirüin tü müliaakat saaliijee niyouktüin naa'inrüin tü nüchekalakat chi Yolujaakai nüpüleerua, nuunteerü nükaalinjüin waya müleka waainjinneere kasa mojusü maa'ulu nütüma chi Yolujaakai.

**Nia alana'aleeka ma'i
Jesucristo nuulia Moisés**

3 ¹Tawalayuwaa, jia aneekuushikana nütüma chi Maleiwakai süpüla jükatannüinjanain suulia jaainjala, anashii joolu'u müleka jülüjale jaa'in waneepia Jesús, süka niain aluwataaushin nütüma Maleiwa süpüla nüküjainjachin nünüiki wamüin. Je sünain niain chi sacerdote mülo'ushikai, nükaaliijüin waya sünain arütkawaa nünainmüin Maleiwa, maa akaapü'ü paala nümaiwa chi laülaashikai napüleerua na sacerdote judíokana. ²Naa'inrüin Jesús waneepia süpüshua tü nuluwataakat anain chi kaneekajalakai nia, maa akaapü'ü Moisés paala nümaiwa na'aka na nüpüshikana Maleiwa. ³⁻⁴Kojutshaatashi ma'i chi Maleiwakai natüma na nüpüshikana maa'ulu yaa. Je maa aka kojutüin nia, kojutshi chi Nüchonkai Jesucristo. Je kojutshi Jesús nuulia Moisés. ⁵Je Moisés, saa'u nüchepchiain nia Maleiwa, naa'inrüin süpüshua tü aluwataanakat anain nia saa'ujee laülaain napüleerua na nüpüshikana Maleiwa. Je joolu'u sülatüitpa wainma juya süchikijee ouktüin nia, ayatshia nia kojutüin sütüma wayuu. ⁶Alu'ujasa Cristo, saa'ujee naa'inrüin tü aluwataanakat anain, alana'aleeshia sünain kojutüin nütüma chi Maleiwakai, süka laülaain nia nütüma napüleerua na nüpüshikana sünainjee Nüchoin nia. Je wayakana, waya nüpüshika'aya maa'ulu yaa müleka wachecherüle

waa'in sünnain anoujaa sümaa
nnojoliin mmoliün waya seema tü
müliia we'rakat.

Achiajaanaa suulia manoulaa

⁷Anuu wane pütchi ashajünüsü
paala, nünüiki chi Naa'inkai
Maleiwa:

“Jaapa jumaala so'uka'i nünüiki
chi Maleiwakai.

⁸Nnojo jiyouktüin shia
majüle aka jia naa'in na
jutuushikana paala sümaiwa
waraitta'ain namaiwa'aya
cha'aya sainküin isashiikat.

Younakuu müshii naya waneepia
nümüin chi Maleiwakai
sünnain noo'ulaküin naa'in
shii'iree naapüin maalü tü
kee'ireekat naa'in.

⁹Noo'ulaka aa'inchi chi
Maleiwakai
sünnain moonooiin naya sümaa
tü nuluwataakat anain,
mayaainje ne'rüin tü kasa
anasü naa'inrapü'üikat
namüin,
je mayaainje naa'inmajünüin
nütüma cha'aya isashiipa'a
so'u pienchi shikii juya.

¹⁰⁻¹¹Je sükajee tia, aashichijaashi chi
Maleiwakai namüin:
‘Ja'itaina aa'inmajünüin naya
tatüma,
ayatshi'iya kaainjalain,
ayatsia nayouktüin tanüiki.
Müinama'aya mekerolüin
naya sulu'u tü mma
neemeraainjatüyaakat alu'u
tatüma’,
müshi nia sünnain pansaain
nünüiki namüin”.

¹²Tawalayuwaa, jalia jia suulia
eejün ja'aka eekai kaainjalain
je nuu'ulaweein suulia anoujaa

nünnain Maleiwa, chi katakai
atüma so'u wayuu. Anakaja
jükaaliijiraale jüpüshua suulia
nümajüin wane ja'akajee:
“Nnojolichipa kasajachin tamüin
chi Maleiwakai”, süka keejia
nümüin kaainjalaa. ¹³Anakaja
jüchehejiraale jaa'in waneepia
suulia kaainjalajüin jia. Jalia jia
suulia “Anasü tü waa'inrakat”
jümajayaale sümaa mojuin tü
jaa'inrakat. Jükaaliijiraa jümaala
jüpüshua, süka saja'tteerüin maalü
tü ka'i eekat süpüla o'tte'ennaa o'u
wayuu. ¹⁴Jiakana a'yataajiraakana
wamaa nümüin Cristo, anakaja
jüchecherüle jaa'in sünnain anoujaa
nünnain waneepia süpüla ka'ikat
süpüshua, maa akaapü'ü jukuai
paala ju'ttaiwa'aya sünnain anoujaa.
¹⁵Soto jaa'in tü pütchi taküjaitpakat
jümüin:

“Jaapa jumaala so'uka'i nünüiki
chi Maleiwakai.

Nnojo jiyouktüin shia
majüle aka jia naa'in na
jutuushikana sünnain
younakuu namüin
waneepia”.

¹⁶¿Jaralii na wayuu younakuu
makana soo'opünaa naapüin nünüiki
Maleiwa? Naya na nujuittitkana
Moisés chajee Egipto. ¹⁷¿Je jaralii
na wayuu jashichika amüin chi
Maleiwakai so'u tü pienchikat shikii
juya? Naya na eekai kaainjalain
so'u tia, na ouktakana saaliijee
naainjala cha'aya eepünaajanale
naya waraittün jalaalashiipa'a.
¹⁸¿Je jaralii na wayuu pansaakana
amüin nünüiki Maleiwa sünnain
nnojoliinjanain nekerolüin sulu'u
tü mma neemeraainjatkat alu'u
nütüma? Naya na moonooinkana
sümaa tü nuluwataakat anain.

¹⁹Niyouktüin chi Maleiwakai süpüleerua nekerolüin na wayuukana sulu'umüin tü mmakat süka nnojoliin nanoujain nünain.

Eemerawaa napüla na nüpüshikana Maleiwa

4 ¹Je joolu'u maa'ulu yaa, pansaasü nünüiki chi Maleiwakai wamü'inya süpüla wekerolüinjanain cha'aya eemüin nia süpüla eemerawaa nümaa. Je sükajee tia, jalia jia suulia eejüin ja'aka eekai “Müichia mekerolüin pia” nümajüin amüin Maleiwakai. ²Aküjünüsü wamüin maa'ulu yaa süchiki tia eemerawaakat maa aka süküjünüin achiki paala namüin na watuushikana. Akatsa'a nnojoliin kasain saapüin namüin, süka nnojoliin nanoujain sünain shiimain tü nümakat chi Maleiwakai namüin. ³⁻⁵Pansaasü nünüiki chi Maleiwakai paala sünain nümüin sümaa jashiee namüin na watuushikana manoujainkana:

“Müina'aya mekerolüin naya sulu'u tü mma neemeraainjatüyaakat alu'u tatüma”.

Soto jaa'in nüchiki chi akaratshikai ka'i ashajünakat paala: “Eemeraashi chi Maleiwakai no'u chi akaratshikai ka'i süchikijee süpüshua tü ni'yataakat anain”. Je mapa wainma juya süchikijee sükumajünüin tü mmakat, müshi nia: “Müina'aya mekerolüin naya sulu'u tü mma neemeraainjatüyaakat alu'u tatüma”. Mayaasije ein paala wanaa namaa na watuushikana tü eemerawaa naapakat Maleiwakai paala süchikijee nükumajüin tü mmakat, nnojoliishii naya ekerolüin sulu'umüin. Wayeena

wayakana anoujashiikana wapüshua ekeroloka wamüiwa sünainmüin tia eemerawaakat.

⁶Mayaashijee nnojoliin ekerolüin na watuushikana aküjünakana amüin süchiki tü eemerawaakat saaliijee moonooiin naya sümaa tü aluwataanakat anain, watüjaa aa'ut sünain eejeertüin wayuu eekai shikeroleertüin. ⁷Wainma juya süchikijee ouktüin na watuushikana, aashajaashi chi Maleiwakai süchiki tü ka'i seemeraainjatkat o'u wayuu nümaa sünainjee anoujaa nünain. Shia tü nüshajakat achiki David:

“Jaapa jumaala nünüiki chi Maleiwakai so'u ka'ikat tüü. Nnojo jiyouktüin shia”.

⁸Watüjaa aa'ut sünain nantüin sulu'umüin tü mmakat Canaán na nachooinkana na watuushikana nümaa Josué chi nalatülashikai. Nnojotkalaka shiain tü eemerawaa nüshajakat achiki David wanaa sümaa nüküjain süchiki tü ka'i sünoujakat o'u wayuu nünain chi Maleiwakai. ⁹Je sükajee tia, yapastü wane eemerawaa nütüma Maleiwa wapüla wayakana nüchooinkana, maa aka neemeraainkain niakai no'u chi akaratshikai ka'i süchikijee nükumajüin tü mmakat. ¹⁰Je so'uweena ka'ikat tia, eemeraweena waya suulia tü wa'yataakat anain, maa aka neemeraainkain chi Maleiwakai süchikijee nükumajüin tü mmakat. ¹¹Je süka yapain wane eemerawaa wapüleerua, anashii eere waa'in süpüla wountünjanain wekerolüin wapüshua'ale sünainmüin tü eemerawaakat, suulia eejüin wa'aka eekai “Müichia mekerolüin pia” nümajüin amüin chi Maleiwakai saaliijee moonooiin nia sümaa tü nuluwataakat anain, maa aka naa'in na watuushikana.

¹²Tü nünükikat chi Maleiwakai, ja'yasü ma'i wamüin süpüla watüjaainjatüin saa'u müleka woonoole sümaa je moonoinre waya sümaa. Müleka kaainjarale waya, shii'iyatüin wamüin. Je sütüma, wayaawata aa'ut tü jülüjakat waa'in, müleka shiimüinre oo'ulaka nnojorüle shiimüin, müleka analein oo'ulaka nnojorüle anain. Je sütüma tü nuluwataakat anain, watüjaa aa'ut tü anasükat süpüla waa'inrüin shia je tü mojusükat süpüla wayouktüin shia. ¹³Nnojotsü een sa'aka tü nukumajalakat chi Maleiwakai eekai sunujulaain nuulia. Otta wayakana, wasouktüinjatü aa'u nümüin süpüshua tü waa'inrakat.

Jesucristo, chi sacerdote mülo'ushikai ma'i

¹⁴Chi wanoujakai anain, nia Jesús chi Nüchonkai Maleiwa, chi sacerdote mülo'ushikai, anashaataakai ma'i, ekerolokai nünainmüin Maleiwa süpüla chain na'ato'u. Anashii müleka wachecherüle waa'in süinain tü wanoula waküjakat achiki sümüin wayuu, süka nüsouktüin Jesús waneepia waa'u nümüin Maleiwa. ¹⁵Süka matsüin waa'in süinain anoujaa, che'ojaasü wamüin akaaliijünaa waainjinneepa kasa mojusü, süpüla nnojoliinjanain kaainjalain. Niecechi Jesús amüliajaka waya saa'u nülätirüitpain süpüshua tü oo'ulakünaakat aa'in süka kasa mojusü, saa'u wayuuin nia maa aka waya. Otta müshia niakai süka maainjalain, alana'aleeshia nuulia chi laülaashikai napüleerua na sacerdote judíokana sümaiwa paala. ¹⁶Je sükajee tia, anakaja müleka warütkaale

nünainmüin chi Maleiwakai süpüla nükaaliijüinjanain waya. Nnojo kaa'in waya neema, süka nümüliajein waya. Je süinainjee na'anasia, nükaaliijeena waya so'u tü ka'i wachuntakat o'u nümüin.

5 ¹Soto jaa'in nakuaiippa na watuushikana paala sümaiwa. Na sacerdote judíokana, naneeküin waneeshia wayuu na'akajee süpüla laülaainjachin napüleerua. Aneekünüshi nia süpüla niain a'yataainjachin nümüin Maleiwa süpüla asouktaa saa'u tü wayuukolüirua, süpüla naapawalinjatüin nümüin chi Maleiwakai tü kasa anasü saapakat wayuu süinain saapiin analu'ut nümüin, je süpüla naapiinjatüin nümüin tü sümü'ünün ouktakat saa'u saainjala tü wayuukolüirua.

²Je chi laülaashikai napüleerua na sacerdote judíokana, saa'u müin aka nia saa'in wayuu süpüshua, nnojoiyaaje maainjalain. Nuuntüin kamanein nia sümüin tü wayuu eekai saa'inrüin wane kasa mojusü eekai matüjaajuuin saa'u süinain mojuin tü saa'inrakat. ³Je saa'u nnojolin maainjalain nia, süpüla naapiinjatüin tü sümü'ününkat wayuu nümüin chi Maleiwakai saa'u saainjala, asülaajüinjachi niaka'iya saa'u naainjala.

⁴Chi laülaashikai napüleerua na sacerdote judíokana, makai aka naa'in Aarón sümaiwa paala, nnojoiishi aneekajiraain nümüiwa. Nnojoiishi kojutshin ne'e süpüla tüü süka nücheküin naa'in süpüleerua. Nia keenakajalaka chi Maleiwakai. ⁵Müshia Cristo, nnojoiishi aneekajiraain nümüiwa süpüla kojutshaataalein ma'i nia süinain niain chi sacerdote mülo'ushikai.

Nnojotsü naa'inkajatüin nümüüwa. Nia keenakajalaka chi Maleiwakai, maa aka nii'iyatüin paala süna'in niain Nüchoin, maa aka tü nümakat nümüin:

“Pia Tachonka'aya.

Süpüla ka'i tüü, te'itaain pia su'upala wayuu süpüshua'a süpüla puluwataainjachin saa'u süka piain Tachoin”.

⁶Nüneeküin Cristo süna'in nümüin:

“Teenaküin pia süpüla piainjachin sacerdote waneepia süpüla ka'ikat süpüshua maa aka nukuaippa Melquisedec”.

⁷Kataiwa'aya no'u Jesús yaa mmolu'u, achuntapü'üshi nümüin Maleiwa süna'in ni'yalajüin sümaa emetuluin nünüiki shii'iree nükaaliijain nia su'utpünaa tü müliaa ni'rüinjatkat naapapa nukuaippa süna'in ouktaa. Je shiimüin süna'in nükaaliijain, süka jüüjüüin nia nümüin chi Maleiwakai otta kojutüin nia nütüma. ⁸Cristo, ja'itaichi niain chi Nüchonkai Maleiwa, nütüjüinya ne'e oonowaa sümaa nünüiki chi Nüshikai sükajee tü müliaa ni'rakat. ⁹Je niainjachi Jesús chi o'tte'erüinjachikai süpüla ka'ikat süpüshua tü wayuu oonookat sümaa nünüiki. Nuuntüin nu'tte'erüin wayuu sükajee kettaaitpain süpüshua tü kee'ireekat naa'in chi Maleiwakai nümüin, ¹⁰je sükajee e'itaashin nia nütüma chi Maleiwakai süpüla niainjachin sacerdote mülo'ushikai maa aka naa'in Melquisedec.

Achiajanaa suulia oo'ulawaa suulia anoujaa

¹¹Je joolu'u, taküjeein ma'i jümüin soo'omüin nüchiki Cristo süna'in

niain sacerdote mülo'ushikai. Otta süka sukulajaa'in ma'i jaa'in süna'in tü ekirajünakat anain jia, isasü tachiki tee'iyatüin shia jümüin maa'ulu yaa. ¹²Kaka'iyaina ma'i jia süna'in jütüjaain naa'u Jesús. ¿Jamüshii jia nnojoliyüliika'a juuntüin ekirajaa wayuu nünain? Che'ojaayüta'aya ne'e jümüin ekirajünaa waneepia süna'in nünüiki Maleiwa, tü ekirajünakat anain jia paala ju'ttaiwa'aya süna'in anoujaa. Müshii aka jia naa'in wane jo'uu süna'in ekajinnaa süchira nii süka isayüliain nüchiki ekaa ekiülü ka'üsü. ¹³Mayaawatüinyüliita'aya jia saa'u tü ekirajünakat anain jia soo'opünaa tü anasukat süpüla jaa'inrüinjatüin shia je tü mojusükot süpüla jiyouktüinjatüin shia.

Nnojotsü jiyaawata aa'u, süka shukulain ma'i jia süna'in ashataa. ¹⁴¿Jaralii yapaka ja'aka süpüla nashatüinjatüin tü tekirajeekat anain jia joolu'u? Nia chi eekai laülaain naa'in süna'in anoujaa, süka eenja'a ne'e naa'in waneepia süna'in tü anasukat süpüla naa'inrüinjatüin shia je süna'in tü mojusükot süpüla niyouktüinjatüin shia.

6 ¹⁻³Je joolu'u, süpüla jülaüle'erüinjatüin jaa'in süna'in anoujaa, anakaja müleka nnojorule shiain jülüjain jaa'in ne'e waneepia tü nüchikikat Cristo ekirajünakat anain paala jia ju'ttaiwa'aya süna'in anoujaa. Ekirajünapü'üshii jia süna'in oo'ulawaa suulia tü kasa mojusü ouktakat atüma wayuu, süna'in tü anoujaakat, süna'in tü woutiisaakat, süna'in e'itawaa ajapüü saa'u wayuu, je süna'in süso'iraainjatüin saa'in wayuu ouktüsü. Je ekirajünapü'üshii jia süna'in kasalajaneerüin

sümüin wayuu saainjala sümaa müliainjatüin shia süpüla ka'ikat süpüshua. Anashii tekirajüle jia joolu'u süna'in tü jeketkat. Shia taa'inreetka müleka nücheküle chi Maleiwakai tapüleerua. Je müleka jüshatüle tü jeketkat, koo'omüinjeerü jümüin jiyawatüin saa'u tü ekirajünakat anain jia paala.

⁴⁻⁶Chi eekai niyouktüin tü shiimain ekirajünakat anain nia, mayaasüje ee'iyatünüin nümüin paala kasa anasü nütüma Maleiwa, müiria nnojolüin jülüjain naa'in süpüla nünoujainjachin süna'in. Müichia moo'ulaa'in nia suulia kaainjalaa, mayaashije ekirajünüin paala nütüma chi Naa'inkai Maleiwa, ja'itairü niyaawatapü'üin saa'u tü kasa anasü süküjjakat nünüiki Maleiwa nümüin, tü kasa anasü naa'inrüinjatkat so'uweena wane ka'i chi Maleiwa Pülashikai. Je sükajee ayatüin nia süna'in kaainjalaa, nnojoiya mmata o'tte'eruushin nütüma Maleiwa. Mojutsai Cristo nütüma su'upala wayuu süpüshua, maa aka paala natüma na jutuushikana wanaa sümaa nakacherüin nia süna'in tü kuruusakat süpüla no'utüin naa'in.

⁷Chi wayuu eekai ni'itaa'in naa'in süna'in tü shiimainkat ekirajünakat anain, naa'inrüin kasa anasü. Müshi aka nia saa'in wane yüüja eere süsotüin tü apünajuushikat kouyasepa tü mmakat. Je chi Maleiwakai, ayatechi a'itirüin juya saa'u türa yüüjjakat süpüla koo'omüinjatüin tü apünajuushikat.

⁸Otta chi eekai niyouktüin tü shiimainkat ekirajünakat anain nia, naa'inrüin wainma kasa mojusü. Müshi aka nia saa'in wane yüüja eere süsotüin ne'e mojuui keimsesü,

mayaasüje a'itüin juya saa'u. Nnojotsü kasain saamüin sümüin wayuu türa yüüjjakat. Süchikijee kaka'iya sa'atapünüin, mojeerü sünüiki tü wayuukolüirua sümüin tü yüüjjakat süna'in sa'ajeerüin shia.

⁹Mayaasüje taküjaitpain jümüin süchiki wayuu ayouktakat tü shiimainkat, tatüjaa aa'uchii jia aishiikana tapüla süna'in jaa'inreerüin tü kasa anasükat süka shiimüin süna'in ju'tte'ennüin. ¹⁰Süka naa'inrüin chi Maleiwakai tü kasa anasükat waneepia sümüin wayuu, tatüjaa aa'uchi nia süna'in nnojoleerüin motüin naa'in tü kasa anasü jaa'inrakat jii'iyatakat aka nümüin tü naaliikat jüpüla. Sotüshii jia naa'in süna'in jii'yataain paala je süna'in ayatüin jia a'yataain süna'in akaalinjaa tü nüchooinkalüirua.

¹¹Je joolu'u, tü kee'ireekat taa'in jüpüleerua, shia tü ayatüinjanain jia süna'in jaa'inrüin wane'ewai jukua tü anasükat sümüin wayuu süka süpüshua jaa'in. Müleka juu'ulaküle tia süpüla ka'ikat süpüshua kataiwa'aya jo'u, naapeerü chi Maleiwakai jümüin so'uweena wane ka'i süpüshua tü kasa anasü ja'atapajakat. ¹²Anakaja'a müleka jüshatüle nakuaippa na wayuu achechetkana naa'in süna'in anoujaa sümaiwa paala. Müleka nnojorüle sukulajaain jaa'in süna'in tü aluwataanakat anain jia, meena aka jia naa'in süna'in jüchecherüin jaa'in süna'in ja'atapajüin tü naa'inrüinjatkat chi Maleiwakai jümüin saa'u pansaain nünüiki jümüin.

**Shiimüin süna'in pansaain
nünüiki Maleiwa waneepia**

¹³⁻¹⁴Soto jaa'in tü nüküjjakat chi Maleiwakai nümüin Abraham chi

watuushikai paala sümaiwa sünaïn maa nümüïn: “Kamaneweechi ma'i taya pümüïn. Watteerü saalin puu'uliwo'u tatüma. Pansaasü tanüiki waneepia, süka tayain Maleiwain. Nnojotsü che'ojaain tamüïn wane wayuu süpüla ‘Shiimüïn nünüiki’ süpüla sümüïn tamüïn, süka matüjain taya aküjaa alawaa”.¹⁵ Süpüshua tü nüküjakat achiki chi Maleiwakai nümüïn Abraham sünaïn pansaain nünüiki nümüïn, aapünüsü nümüïn süka shiimüïn ma'i tü aküjünakat nümüïn, je na'atapajüïn shia.

¹⁶Je wayuu, müleka süküjüle süchiki saa'inrüinjatüïn wane kasa, che'ojaasü wane wayuu sümüïn atüjaaïnjatkat saa'u tü sümakat. Maa aka nüchehajaale saa'u nünüiki, nnojoleerü ein a'ülüjaaajirawaa saa'ujee tia. Aluwataaneechia ne'e nia sünaïn naa'inrüinjatüïn tü nümakat paala su'upala wayuu.¹⁷ Je chi Maleiwakai, süka nücheküïn süpüleerua sütüjaaïnjatüïn naa'u wayuu sünaïn nikerajüïn tü naa'inrüinjattüjütkaia paala, nii'iyatüïn sümüïn sünaïn pansaain nünüiki je sünaïn naa'inrüinjatüïn tü nümakat süka niain Maleiwain.¹⁸ Süka pansaain nünüiki waneepia, nnojolüja'a alawaain tü nümakat. Je süka niain Maleiwain süpüla ka'ikat süpüshua, nüküjeerü waneepia tü shiimainkat. Je naa'inrüïn tü nümakat süpüla nüchekerüïnjatüïn waa'in sünaïn anoujaa su'unnaa tü müliaa we'rakat. Je watüjaa aa'ut sünaïn naa'inreerüïn chi Maleiwakai tü nümakat wamüïn. Pansaasü nünüiki wamüïn, je matüjainsai nia aküjaa alawaa.¹⁹⁻²⁰ Je sükajee tia, watüjaa aa'uchi nia sünaïn nüikkale'ertüïn nikii

süpüla tü wamakat nümüïn. Maa aka tü kachueera ajapulü'ujakat anua, akaajaa nünüiki Maleiwa sünaïn sajalpulü'uïnjatüïn waa'in. Ja'itaichi chain chi Maleiwakai iipünaa, nnojoiishi wattain woulia. Müichia nnojolin anujulaain nia woulia, süka nu'unüichipain Jesús nümülatu'umüïn süpüla nüsouktüïnjachin nümüïn waa'u, maa aka chi laülaashikai napüleerua na sacerdote judíokana paala sulu'u tü a'waajüleekat chi Maleiwakai sünaïn nikerolüïn nünainmüïn waneemüïn sa'ata tü kuluulu sítatüjiaakat tü paükat. Nia Jesús chi sacerdote mülo'ushikai süpüla ka'ikat süpüshua maa aka naa'in Melquisedec sünaïn ni'yataain nümüïn Maleiwa.

E'itaashi Melquisedec nütüma Maleiwa

7¹Otta müshia Melquisedec, nia aluwataashika paala sümaiwa saa'u wayuu sulu'u tü pueulo kanüliakat Salem, nia wane sacerdote e'itaashikai nütüma chi Maleiwa Miyo'ushikai ma'i. Soto jaa'in wanaa sümaa nüntiraain nümaa chi watuushikai Abraham wanaa sümaa nüle'ejüïn Abraham süchikijee nükanajüïn tü wane laülaayusükalüüria. Nüchuntakalaka Melquisedec nümüïn chi Maleiwakai naa'u süpüla naapüïnjatüïn na'anasia nümüïn.²Otta müshia Abraham, asülaajüshi nümüïn Melquisedec polo'owai sünaïnjee tü polookot shikii süpüshi tü nüsitkat sünaïnjee atkawaa. Otta müsia tü anüliee “Melquisedec” makat, “naa'inrüïn tü anasükat sünaïn aluwatawaa” malu'ut. Je sünülia tü pueulokat “Salem”

makat, “jimatüsü tü mmakat eere nuluwataain” malu'ut. ³Nnojotsü watüjaain aa'u nüchiki nüshi, süchiki nii, süchiki nutuushinuu, nüchiki sünnain jemeishin, otta nüchiki sünnain ouktüün. Shia'ala watüjaaka aa'u tü nüchikikat sünnain sacerdotein nia, maa aka nukuaippa chi Nüchonkai Maleiwa sünnain sacerdotein süpüla ka'ikat süpüshua.

⁴Jirakaa sümmün nukuaippa Melquisedec sünnain kojutuleein ma'ia. Watüjaa aa'ut sünnain kojutüün ma'ia nütüma chi wekiishikai Abraham, süka nüsülajüün nümün süpüshi tü nüsitkat sünnainjee atkawaa, wane poloo sünnainjee poloo shikii. ⁵Je na'aka na Levíkana e'iruku, wane nuu'uliwo'ukalüürua Abraham, eeshii eekai na'yataain sünnain sacerdotein. Saashin tü nüshajakat paala Moisés, acheküsü akotchajünajatüün süpüshi suwashirüün tü wayuukolüürua, tü polookot sünnainjee poloo shikii, natüma na sacerdote Levíkana nama'anajee na nawalayuukana, mayaashijee'e nüchooin naya Abraham napüshua. ⁶Je Melquisedec, mayaainje nnojolüün Levüün ni'iruku, asülajüshi Abraham nümün tü polookot sünnainjee poloo shikii. Je Abraham, mayaashijee kojutüün nia nütüma Maleiwa sümaa aashajaanapü'üün amaa nia nütüma sünnain pansaain nünüiki Maleiwakai nümün, watüjaa aa'uchi sünnain niain alana'aleein Melquisedec sünnain kojutüün nuulia, süka niain achuntüün shii'iree naapüünjatüün chi Maleiwakai na'anasia nümün Abraham. ⁷Shiimün sünnain alana'aleein nüpülain chi achuntakai nuulia chi achuntünakai aa'u.

⁸Na wayuu sacerdote Levíkana

okotchajapü'ükana süpüshi suwashirüün wayuu, antüsü ouktaa namüün maa aka sümmün wayuu süpüshua. Otta müshia Melquisedec, mayaashijee müün aka saa'in nakuaippa na Levíkana sünnain aapünaa amüün süpüshi suwashirüün wayuu, aküjünüsü nüchiki sulu'u tü karaloukta nüchikimaajatkat Maleiwa sünnain katayüliain no'u.

⁹⁻¹⁰Na sacerdote Levíkana, naya okotchojülüika süpüshi suwashirüün tü wayuukolüürua. Mayaashijee'e nnojoliin jemelin na Levíkana nuu'uliwo'ukana Abraham wanaa sümaa nüsülajüün süpüshi tü nuwashirüünkat nümün Melquisedec, müshii aka eejanakai naya sünnain asülajaa nümün wanaa nümaa chi natuushikai.

Jesucristo, müshi aka naa'in Melquisedec

¹¹Saashin tü ashajünakat nütüma Moisés, acheküshii naneekünüünjanain na sacerdote judíokana na'akajee na nuu'uliwo'ukana Aarón, na Levíkana. Otta nayakana, süka isain nountüün naa'inrüün süpüshua tü nüchekakat chi Maleiwakai, aneekünüichipa joolu'u wane sacerdote müün aka naa'in Melquisedec. Je watüjaa aa'uchi Melquisedec sünnain nnojolin nuu'uliwo'uin nia Aarón. ¹²Je joolu'u, sünnainjee su'wanajaitpain nakuaippa na sacerdote judíokana, ee'iranajaanünjatü joolu'u wapüleerua tü aluwataanakat anain waya. ¹³⁻¹⁴Chi taküjakai achiki, nia chi Wasenyotsekai. Je we'raajüün nia sünnain nuu'uliwo'uin Judá. Naatajatü ni'iruku noulia na sacerdote Levíkana. Nnojishi aashajaan

Moisés süchiki naneekünüinjanain na nuu'uliwo'ukana Judá süinain sacerdoteinjanain naya. Je nnojotsü eepü'üin na'akajee nuu'uliwo'u Judá eekai na'yataapü'üin nümüin Maleiwa süinain sacerdotein.

¹⁵Shiimüin süinain niweetüichipain chi Wasenyotsekai süinain niain wane sacerdote maa aka naa'in Melquisedec. ¹⁶Tü aneekünaka anainjee nia süpüla sacerdotein, nnojotsü sükajeejatüin nayain sacerdotein na nutuushinuukana, shia süinainjee matijüin nia ouktaa. ¹⁷Maa aka tü ashajünakat paala sulu'u tü nüchikimajatkat chi Maleiwakai:

“Teenaküin pia süpüla piainjachin sacerdote waneepia süpüla ka'ikat süpüshua maa aka nukuaippa Melquisedec”.

¹⁸⁻¹⁹Nnojotpü'üsü akaaliijünün wayuu sütüma tü nuluwataakat anain Moisés süpüla suuntüin tü wayuukolüirua tü nüchekakat chi Maleiwakai süpüleerua. Mayaasüje noo'ulaküin shia, ayatshi'iya mekettaajuuin namüin tü naa'inreekat chi Maleiwakai. Otta wayakana, alana'aleesia ma'i süinain anain tü wa'atapajakat, süka jutatüitpain wapüleerua süpüla warütkaainjanain nünainmüin Maleiwa.

²⁰⁻²¹Je wane kasa anasüya: Wanaa sümaa nüneekünüin Jesús, pansaasü nünüiki chi Maleiwakai nümüin:

“Shiima'inya ma'i tanüiki pümüin süka Maleiwain taya. Taneeküin pia süpüla piainjachin sacerdote waneepia tamüin süpüla ka'ikat süpüshua.

Je süka tayain Maleiwa, nnojoleerü ta'wanajaain tanüiki”,

müshi nia nümüin. Otta na sacerdote Levíkana, nnojotsü majatüin nünüiki chi Maleiwakai namüin. ²²Saa'u pansaain nünüiki chi Maleiwakai nümüin chi Nüchonkai, watüjaa aa'uchi chi Maleiwakai süinain shiimüin süinain nikeraajüinjatüin wapüla süpüshua tü nümakat wamüin, tü pütchi jeket e'itaanakat nütüma süinain pansaain. Alana'aleesia ma'i tü nümakat chi Maleiwakai wamüin joolu'u suulia tü nümakat paala sümaiwa namüin na watuushikana. Je shiimüin ma'i süinain nükaaliijain waya Jesucristo süpüla waa'inrüinjatüin tü nüchekakat chi Maleiwakai wapüleerua.

²³Wainma ma'i tü sacerdote judíokalüirua sümaiwa. Nnojoishii ayatüin naya waneepia süinain sacerdotein süka ouktawalin naya. Ouktapa wane, aneekünüishi wane nii'irakaya. ²⁴Alu'usa Jesús, kato'uchi süpüla ka'ikat süpüshua süka matijüin ouktaa nia. Kapülejeetkalaka aneekünüin wane nii'iraka süpüla sacerdotein. ²⁵Süka nnojoleechin nuu'ulaain suulia sacerdotein nia, asoukteechi waneepia nümüin chi Maleiwakai saa'u tü wayuukolüirua arütkaakat nünainmüin Maleiwa süinainjee nüsouktüin saa'u. Je süka katüin no'u süpüla ka'ikat süpüshua, nuuntüin nu'tte'erüin tü wayuukolüirua süpüla katüinjatüin so'uya süpüla ka'ikat süpüshua.

²⁶Je Jesús, sükajee niain chi sacerdote mülo'ushikai, nükaaliijain waya waneepia süinain süpüshua tü che'ojaakat wamüin. Talatashaatasü

naa'in chi Maleiwakai nümaa, süka lotüin nukuaippa sümaa maainjalain nu'upala. Akataluushi nia noulia na wayuu kaainjaraliikana kepiakana yaa mmolu'u. Je eeshi nia joolu'u nümaa Maleiwa chaa iipünaa sümaa kojutüin ma'i nia nütüma. ²⁷Jesús, nnojoiishi müin aka naa'in chi laülaashikai napüleerua na sacerdoté judíokana. O'utapü'üshi nia saa'in mürüt waneepia nümüin chi Maleiwakai saa'u naainjala niakai palajana, je süchikijee, saa'u saainjala tü wayuukolüirua. Otta müshia Jesús, wwatua ne'e aapajiraashi nikii süpüla ouktaa saa'u saainjala wayuu. Kettaaitpa shia. Nnojotsü che'ojaain nümüin nuu'ulaküin nüchikua. ²⁸Saashin tü nuluwataakat anain Moisés, aneekünawaisü wayuu süpüla laülaainjatüin napüleerua na sacerdotekana. Otta sa'aka wayuu süpüshua, nnojotsü ein eekai katsüin saa'in waneepia sünaain anoujaa süpüla a'yatawaakat tia. Otta chi nüneekakai chi Maleiwakai mapa süchikijee nukalia Moisés sünaain pansaain nünüiki nümüin, nia'a ne'e chi Nüchonkai, süka niain atüjain waneepia süpüleerua naa'inrüin süpüshua tü nüchekakat chi Maleiwakai.

Nikeraajüin Jesús tü pütchi jeket ni'itaakat Maleiwa

8 ¹Otta Jesús, chi sacerdoté mülo'ushikai, nia tashajaka achiki jümüin sünaain nu'unüin chaa iipünaamüin eere nuluwataain chi Maleiwa Pülashikai süpüla joyotoo na'ato'u nikialu'ujee sünaain kojutüin ma'i nia nütüma je süpüla asouktaa waa'u waneepia nümüin. ²Nia a'yataaka nümüin

chi Maleiwakai maa'ulu yaa sünaain sacerdotéin sulu'u tü a'waajüleekat. Tü a'waajülee chakat iipünaa, lotüsü ma'i sukuaippa. Nia ke'inaajalaka Maleiwa, nnojotsü sükumajalain wayuu maa aka saa'in tü a'waajüleekat yaa mmolu'u natüma na judíokana.

³Je chi laülaakai napüleerua na sacerdoté judíokana, aneekünüshi süpüla naapawalinjatüin nümüin Maleiwa tü kasa anasü saapakat wayuu sünaain saapüin analu'ut nümüin je tü sümü'ünüin ouktajkatk saa'u saainjala. Akaaja'a Jesús nüneekünaiwa'aya sünaain sacerdotéin, che'ojaasü naapüinjatüin kasa nümüin chi Maleiwakai. ⁴Je müleka yaaleje Jesús wa'aka yaa mmolu'u, nnojoihsije aneekünüin nia süpüla sacerdotéin, süka einapain na aneekünakana süpüla. Je saashin tü nuluwataakat anain Moisés, nayainjana nayakana asülajaka nümüin Maleiwa tü kasa anasü saapakat wayuu. ⁵Je tü a'waajüleekat yaa mmolu'u eere ni'yataain chi sacerdoté judíokai, ja'itairü meemain aka saa'in tü a'waajülee iipünaakat, nnojotsü shiain. Su'uyaakua ne'e. Je süpüla shiainjatüin su'uyaakua tü iipünaajatkat, münüshi Moisés nütüma chi Maleiwakai süpülapünaa naainjain tü a'waajüleekat paala sümaiwa: "Jalia paa'inra ma'i shia maa aka saa'in sukuaippa tü tee'iyatakat paala pümüin saa'u tü uuchikat". ⁶Je jiakana joolu'u, nnojoo motüin jaa'in sünaain sülan'aaleein sünaain anain tü naa'inrakat chi Maleiwakai wamüin nukajee Jesús suulia tü naa'inrakat paala namüin na watuushinuukana. Shiimüin sünaain nikeraajüinjatüin Jesús wapüla süpüshua tü nümakat chi Maleiwakai wamüin, tü pütchi

jeket e'itaanakat nütüma sünain pansaain nünüiki. Je maa aka sülan'aaleein sünain anain tü nümakat chi Maleiwakai wamüin suulia tü nümakat namüin na watuushinuukana, müsia tü ni'yataakat anain Jesús nümüin Maleiwa sünain alana'aaleein suulia tü na'yataakat anain na sacerdote judíokana.

⁷Mayaasije'e ni'itaalain chi Maleiwakai tü pütchi nümakat namüin na watuushinuukana sünain pansaain nünüiki namüin, isasü nachiki naa'inrüin süpüshua tü nuluwataakat anain. Je sükajee tia, acheküsü ni'itaainjatüin wapüla wane pütchi jeket saa'ujee pansaain nünüiki wamüin.

⁸Saa'u nnojolüin noo'ulaweein na wayuukana suulia naainjala, asouktüshi chi Maleiwakai sünain aküjaa süchiki tia pütchi jeketkat, sünain maa:

“Je so'uweena wane ka'i,
te'itaajeerü napüla na wayuu
Israelkana oo'ulaka na
Judákana
wane pütchi jeket sümaa
pansaajeerüin tanüiki
namüin.

⁹Nnojoleerü müin aka saa'in tü pütchi te'itaakat paala napüla na natuushinuukana tojuittiraiwa'aya naya chajee Egiptojee.

Too'ulaa'in naya, süka moonoo'in sümaa tanüiki.

¹⁰¿Otta kaseerü saa'inraka namüin tü pütchi jeket te'itaainjatkat tayakai chi Maleiwakai süpüla tü wayuu Israelkalüirua? Kee'ireweerü sulu'u jülüjain naa'in tü taluwataakat anain so'uweena tia,

süka takaaliijeenain naya.

Je sünain Namaleiwasein taya, tayeechi na'waajaka waneepia süka taa'inmajeenain naya meinshi.

¹¹Nnojoleerü che'ojaa'in namüin nekirajiraain tachiki sünain 'Anakaja jüshatüle nüchiki chi Maleiwakai' namajiraain, süka shi'raajeechin taya wayuu süpüshua, makai aka chira eekai washirüin je chira eekai mojuin.

¹²Tamülüjaeena naya ja'itaina kaainjaraliin, je müiria nnojolüin sotüin taa'in süpüshua tü kasa mojusü naa'inrakat”.

¹³Je süka tü “pütchi jeket” nümakat chi Maleiwakai, watüjaaitpa aa'u sünain nnojolüitpain kasain anain apüla tü pütchi ni'itaakat paala napüla na wayuu judíokana. Je tü kasa eekai nnojolüitpain kasain saamüin nümüin, amoukteerü maalü.

Tü nakuaippapü'ükat na judíokana sünain a'waajaa Maleiwa

9 ¹Je sa'aka tü pütchi e'itaanakat paala nütüma chi Maleiwakai napüla na wayuu judíokana, aküjünüsü namüin jamüinjatüin sukuaippa tü a'waajülee nakumajüinjatkat yaa mmolu'u, je jamüinjatüin nakuaippa sünain a'waajaa chi Maleiwakai. ²⁻³Je sulu'u tü a'waajüleekat, tü akumajünapü'ükat natüma, kataijiasü wane kuluulu süpüla akatalaa pasanainpünaa. Je sünülia tü palajatkat paü eere nikerolüin palajana chi sacerdote judíokai,

“Nü'itpa'a Maleiwa” münüsü. Je yaa sulu'u, eesü wane rampara akijünakat achiki paala nütüma Maleiwa oo'ulaka müsia wane meesa e'itaanakat aa'u tü pan a'waajjakat Maleiwa. Shiasa tü paü shiinalu'usükat, “Nümülatu'u Maleiwa” münüsü. ⁴Je yaa sulu'u tü paikat, eesü wane a'ajülee wunu'u jemeta ejuutu, o'oojiruushi süka ooro. Eesü wane juraskeerü süpüla sotüinjatüin naa'in wanaa sümaa ni'itaain paala chi Maleiwakai tü pütchikat namüin. Oorole'eya sítoutajee. Je sulu'u tü juraskeetkat, eeshi wane pachiishichon oorole'eya kalu'ukai süpüshi tü eküülü kanüliakat “maná” münüin nekakat paala na natuushikana. Eesü tü nuwaraaratsekat Aarón awü'itkat paala sümaa julaa. Je eesü tü pimasükat ipa makat aka saa'in taapüla ashajünakat anain paala tü pütchi e'itaanakat nütüma Maleiwa napüla. ⁵Je yaa saa'ujee tü juraskeetkat, eesü nayaakua wane kasa eekai katünain. Wayawayatsü tü natünakat saa'u shirouse tü juraskeetkat eepü'üle sütülüittinnapü'üin süsha tü mürüt o'utinnapü'ükat aa'in süpüla sülatinnüinjatüin saainjala wayuu. E'itaanüsü tü shiyaakuakat suulia motüin naa'in na wayuukana sünnain ein chi Maleiwakai namaa. Keraasü joolu'u süchiki tü kasa yaakat sulu'u tü a'waajüleekat yaa mmolu'u natüma na judfokana.

⁶Keraapa tü a'waajüleekat sümaa tü korokokot sulu'u, ekerotpü'üshi chi sacerdote judfokai weinshi sulu'umüin tü palajtkat ne'e paü süpüla ni'yataainjachin nümüin Maleiwa. ⁷Otta sulu'umüin tü paü shiinalu'usükat, nia ne'e

ekerotka nümüiwa chi laülaashikai napüleerua na sacerdote judfokana. Wwatua ne'e nukua süpüla juyakat. Je nikerolapa, alü'üjawalinjachi süsha mürüt o'utinnakat aa'in süpüla naapüin nümüin Maleiwa saa'u naainjala niakai je saa'u aainjalaa nnojotkat nattüjaain aa'u na wayuukana sünnain mojuin. ⁸Nüso'irüin joolu'u waa'in chi Naa'inkai Maleiwa sünnain nnojoliin nountüin ekeroloo na wayuukana chamüin nünainmüin chi Maleiwakai sulu'u tü a'waajüleekat chakat iipünaa, sükajee ayatüin tü a'waajüleekat yaa mmolu'u.

⁹Müleka jülüjüle waa'in sukuaiippa tü a'waajüleekat yaa mmolu'u natüma na judfokana je tü naa'inrakat chi sacerdote aapüikai yaa sulu'u, shia ne'e kayaakuaka tü kasa ekirajünakat anain waya maa'ulu yaa. Shii'iyatüin wamüin sünnain nnojoliin kasain anain apüla nümüin chi aapüikai tü nasülajakat na wayuukana nümüin chi Maleiwakai süpüla anainjatüin naa'in niakai oo'ulaka naa'in na wayuukana nümaa Maleiwa. ¹⁰Aluwataanüshii ne'e naya sünnain jamüinjatüin nakuaiippa sünnain tü ekawaakat je tü asawaakat je tü o'lojowaakat ajapüü. Nnojotsü sükaaliijain naya süpüla wuleinjatüin tü naa'inkat nu'upala Maleiwa. Aluwataanüshii naya sünnain kasa eekai müin aka tia süma'inru'u naapüin chi Maleiwakai namüin tü pütchi jeket e'itaaneetkat napüla.

Alana'aleesia ma'i tü nüshakat Cristo suulia tü süshakat mürüt

¹¹Otta müsia joolu'u, jeketüitpa süpüshua. Eweetüshi Cristo

sünain niainjachin chi sacerdote mülo'ushikai süpüla naapüinjatüin wamüin wulee aa'in nu'upala Maleiwa süpüla jutatüin waa'in ja'itaina kaainjaraliin waya. Ekerotüshi nia sulu'umüin tü a'waajüleekat cha'aya iipünaa, tü nnojotkat sukumalain wayuu. Alana'alesia ma'i shia sünain anasüin suulia tü a'waajüleekat yaa mmolu'u natüma na jutuushikana, tü akumajuushikat ne'e sütüma wayuu süpüla motso'o. ¹²Cristo, nnojoiishi müin aka naa'in chi laülaashikai napüleerua na sacerdote judíokana ekerolopü'ükai juya'wai sulu'umüin tü paü shiinalu'usükat, “Nümülatu'u Maleiwa” münakat. Wwatua ne'e nikerolüin Cristo sulu'umüin tü a'waajüleekat cha'aya iipünaa. Je tü isha naapakat nümüin chi Maleiwakai, nnojotsü nüshain kaa'ula tooo, nnojotsü nüshain wane paa'achon, maa aka tü naapawaitkat chi sacerdote judíokai paala. Shia naapaka nüsha niakai. Je amülapa nüsha sünain ouktüin nia, nuuntuin taashin waya nütüma suulia waainjala. Müina'aya waya nnojoliin süsalain waainjala nütüma Maleiwa. ¹³Chi sacerdote judíokai, nütülüittipü'üin naa'u na wayuu yarüttakana akuaippa nu'upala Maleiwa nüsha wane kaa'ula tooo, nüsha wane paa'a tooo, otta wane wüin ka'akasü süpali'ise wane paa'achon, süpüla anouktaa nakuaippa süpülapünaa narütkaainjatüin tü a'waajüleekat. ¹⁴Otta müshia Cristo, sünain naa'inrüin waneepia tü nüchekakat chi Maleiwakai nüpüleerua, je sünain katsüin maa'in nütüma chi Naa'inkai matüjainkai ouktaa, aapajiraashi nikii süpüla ouktaa

nümüin chi Maleiwakai. Maa aka nakaalinjünapü'üin na watuushikana süka süsha mürit ne'e süpüla sünouktaain nakuaippa, alana'aleeshi'iyaa ma'i sünain anain waya sütüma nüsha Cristo amülatat waa'ujee. Je sünainjee ouktüin nia saa'u waainjala, nuuntuin naapüin wamüin jutataa aa'in ja'itaina kaainjaraliin waya, tü nnojotkat aapünüin namüin na watuushikana soo'opünaa süpüshua tü naa'inrakat. Je süka wuleitpain waa'in, acheküshii wa'yataain waneepia nümüin chi Maleiwa katakai atüma wo'u.

¹⁵Nünainjee Cristo, ni'itaain chi Maleiwakai wane pütchi jeket wapüla waya ounejuushikana, süpüla naapüinjatüin wamüin süpüshua tü nüküjakat achiki paala wamüin sümaa pansaain nünüiki, tü kasa anasü wama'aneetkat süpüla ka'ikat süpüshua. Akaajaa na watuushi e'itaanakana apüla paala tü palajatkat pütchikat nütüma Maleiwa, mayaainje kaainjalain naya sünainjee moonoin sümaa tia, taashiinapa naya joolu'u suulia naainjala süka ouktüichipain Cristo.

¹⁶Maa aka sukuaippa sütüma wayuu sünain karalouktalu'uin süchiki jaralüinjatüin aapünüin amüin tü nükorolokot wane wayuu ouktapa nia, nnojoliwa'aya ouktüin chi wayuukai, nnojotsü aapünüin tü korolokot. ¹⁷Otta nütüjaanapa aa'u sünain ouktüin nia, ekeraajüsü süpüla sünoujünüin tü ashajuushikat. Aapüna münüisia tü korolokot. ¹⁸Müisia aka tü pütchi e'itaaushikat paala nütüma Maleiwa napüla na watuushikana. Ekeraajüsü shia amülapa süsha wane mürit. Nnojoliüwa'aya sütülüittinnüin

isha, nnojotsü kettaain tü pütchikat. ¹⁹Soto jaa'in tü naa'inrapü'ükat Moisés. Süchikijee nüsü'irüin naa'in na watuushikana süinain süpüshua tü nuluwataakat anain chi Maleiwakai, tü ashajünakat paala nütüma Moisés sulu'u karaloukta, naapaakalaka wane sütüna wunu'u kanüliakat "hisopo" ke'ichiru'usü soi anneerü ishotot. Je süka tüü, nütülüüttirakalaka isha paliraasü sümaa wüin, nüsha wane paa'a oo'ulaka nüsha wane kaa'ula, saa'u tü karalouktakat oo'ulaka saa'u tü wayuukolüürua süpüshua, ²⁰sünain nümüin namüin: "Anuu tü isha shikeraajakat atüma tü pütchi ni'itaakat jüpüla chi Maleiwakai, tü nuluwataakat anain jia süpüla joonooijnanain sümaa". ²¹Je müsia aka sukuaiippa nütüma süinain nütülüüttirüin tü ishakat saa'u tü a'waajüleekat oo'ulaka saa'u süpüshua tü korolokolüürua yaakat sulu'u, tü ni'yataakat aka nümüin chi Maleiwakai. ²²Saashin tü ashajuushi aluwataanakat anain na watuushi judfokana nütüma Maleiwa, alatinnüsü saainjala tü wayuukolüürua müleka sütülüüttinnüin süsha mürüt naa'u. Nnojolüiwa'aya ouktüin wane mürüt sümaa sütülüüttinnüin süsha naa'u, nnojotsü alatinnüin naainjala. ²³Saa'u shiyaakuain ne'e shia tü a'waajülee chakat iipünaa, che'ojaawaisü uleinjatüin shia sükajee su'utinnawalin saa'in mürüt süpüla saapünüin tü süshakat nümüin Maleiwa. Otta süpüla tü a'waajülee chakat iipünaa eere chi Maleiwakai, acheküsü aa'innaa kasa eekai alana'aleein süinain anain suulia. ²⁴Nnojoiishi ekerolüin Cristo sulu'umüin wane a'waajülee

eekai sükumalain wayuu ne'e yaa mmolu'u, sulu'umüin tü shiyaakua ne'e tü shiimainsü chakat iipünaa. Otta ekerotshi nüma'anamüin chi Maleiwakai chaa iipünaa süpüla asouktaa waa'u waneepia nümüin süpüla nükaaliijain waya. ²⁵Je Cristo, nnojoiishi müin aka naa'in chi laülaashikai napüleerua na sacerdoté judfokana ekerolowaikai juya'wai sulu'umüin tü paü shiinalu'usukat "Nümülatu'u Maleiwa" münakat, süpüla naapawalinjatüin nümüin chi Maleiwakai wane isha nnojotkat nüshain. Nnojotsü kojuyatuain nukua Cristo süinain ekeroloo nüma'anamüin Maleiwa süinain aapajirawaa nikii nümüin. ²⁶Müleka kojuyatualeje naapajiraain nikii, ouktüshije nia wainmatua süchikijee sükumajünüin tü mmakat. Shiasa joolu'u mapainka pejepa süinain saja'lajaainjatüin tü ka'ikalüürua süpüshua, antüshi Jesús wwatua ne'e wa'akamüin süpüla motüinjatüin naa'in waainjala Maleiwa süinainjee aapajiraain nikii Jesús süpüla ouktüin waa'u. Shiairia ne'e, nnojoleechi aapajiraain nikii nüchikua. ²⁷Maa aka wayuu süpüshua süinain wwatuinjatüin ouktüin sümaa süsouktüinjateerüin nümüin chi Maleiwakai süchikijee ouktaa, ²⁸akaajaa Cristo süinain wwatuin ne'e naapajiraain nikii süpüla ouktaa, motüinjatka akajee naa'in saainjala wayuu wainma. Shiimüin süinain nünteechin Cristo nüchikua wa'akamüin. Otta nnojoleechi ale'ejüin nia süpüla nuwalaajüinjachin waainjala nüchikua, alu'ujasa süpüla naapüinjatüin tü o'ttawaakat sümüin süpüshua tü wayuu a'atapajakat süinain nüntajachin.

Cristo, naapajiraain nikii wwatua ne'e

süpüla anajiraainjatüin wayuu

10 ¹Tü nüshajakat Moisés, nnojotsü antiraain sümaa süpüshua tü kasa anasü naapeetkat chi Maleiwakai wamüin waya o'ttaashiikana nütüma Cristo. Sükajee shiyaakuain ne'e tia, maamüinsat shia namüin na wayuu arütkaweekana nünainmüin Maleiwa. Nnojotsü suuntuin anajiraainjanain naya nümaa chi Maleiwakai, ja'itairü aapünawalin süsha mürüt juya'wai. ²Müleka anajiraaleje naya sütüma saapünüin tü süshakat mürüt, noo'ulaainje suulia naapüin. Ayatshi'iya naya aapüin süka nnojyüliain süla'ajünüin noulia tü naainjalakat. Müleka shiimüinreje sünain saakatünüin tü naainjalakat noulia sütüma sütülüittinnüin tü süshakat mürüt, çjamaka'a naya ayataka'a sünain mojuin naa'in saalii naainjala? ³Akaajaa sütüma tü naa'inrapü'ükat sünain naapawalin tü ishakat juya'wai, suso'ira aa'inchii sünain kaainjaraliin naya, ⁴süka nnojolüin saakatünüin saainjala wayuu sütüma sütülüittinnüin süsha mürüt.

⁵Je sükajee shiimüin tüü, pejepa süpüla nüntüinjachin Cristo yaa mmolu'u sa'akamüin wayuu, müshi nia nüümüin chi Maleiwakai:

“Tatüjaa aa'uchi pia sünain piyuktüin süpüleerua saapünawalin pümüin tü süshakat mürüt. Shia püchekaka tapüleerua jemeinjachin taya maa aka sukuaiappa wayuu süpüshua

süpüla ouktajachin taya saa'u.

⁶Nnojotsü shiain talatüin atüma paa'in tü süshakat mürüt saapakat wayuu saa'u saainjala”.

⁷Shiasa süchikijee tia, nümakalaka Cristo nüümüin: “Maleiwakalee, maa aka paala tü tachiki ashajünakat nütüma Moisés, yapaichipa taya süpüla taa'inrüinjatüin waneepia süpüshua tü kee'ireekat paa'in tapüleerua”.

⁸Mayaasüje aluwataanüin wayuu paala sütüma tü nüshajakat Moisés sünain saapawalinjatüin tü kasakat nüümüin Maleiwa, nnojotsü nücheküin tia maa'ulu yaa saashin tü nümakat Cristo sümaa sümüin: “Nnojotsü shiain talatüin atüma paa'in tü süshakat mürüt saapakat wayuu saa'u saainjala”. ⁹Mojutüitpa nüümüin Cristo tü saa'inrapü'ükat paala tü judiokalüirua. Nii'iyatüitpa wamüin wane jeketkat shii'iraka süpüla warütkaainjanain nünainmüin Maleiwa. Shia sünainjee tü naa'inrakat Cristo, maa aka tü nümakat: “Yapaichipa taya süpüla tü püchekakat tapüleerua”.

¹⁰Je joolu'u, süka naa'inrüitpain Jesucristo süpüshua tü nüchekakat chi Maleiwakai nüpüleerua sünain aapajirawaa nikii wwatua ne'e süpüla ouktaa waa'u, taashiinapa waya suulia waainjala süpüla warütkaainjanain nünainmüin chi Maleiwakai.

¹¹Na sacerdote judiokana, sünain na'yataain nüümüin chi Maleiwakai, mayaasüje naapawalin wainmatua tü kasakat nüümüin Maleiwa, nnojotsü aakatünüin naainjala na wayuukanairua noulia

sütüma. ¹²Otta müshia Cristo, aapajiraashijachi nikii wwatua ne'e süpüla ouktüinjachin saa'u saainjala wayuu. Nnojolechi aapajiraain nikii nüchikua. Je maa'ulu yaa, ichaa nia joyotüin nikialu'ujee chi Maleiwakai süka kettaaitpain tü ni'yataainkat. ¹³A'atapajüshi nia cha'aya iiptünaa süma'inru'u sükanajuuinjatüin süpüshua tü nü'ünüükalüirua nütüma Maleiwa. ¹⁴Sünainjee naapajiraain nikii Cristo süpüla ouktaa, anajiraainapa nümaa Maleiwa waneepia na wayuu ala'ajaanakana oulia naainjala. Wwatua ne'e naapajiraain nikii süpüla ouktajachin nia.

¹⁵Je nii'iyatüin wamüin chi Naa'inkai Maleiwa süna'in shiimüin tia. Shia tü nükjajakat achiki Maleiwa süna'in nüümüin:

¹⁶“So'uweena wane ka'i,
te'itaajeerü wane pütchi
jeket napüla na wayuukana
sümaa pansaajeerüin tanüiki
namüin
süpüla kee'ireeinjatüin naa'in
waneepia tü taluwataakat
anain naya”.

¹⁷Je nii'iyatüin wamüin wane'eya nümakat Maleiwa:

“Müiria motüin taa'in naainjala”.

¹⁸Je joolu'u, süka süla'ajaanüitpain waainjala woulia sümaa taashiinapain waya suulia nükajee Cristo, nnojolüitpa che'ojaain wamüin aapaa kasa nüümüin Maleiwa saa'u waainjala.

**Eme'ennaa aa'in süpüla
achecherawaa süna'in anoujaa**

¹⁹⁻²⁰Je joolu'u tawalayuwaa, süna'injee naapajiraain nikii Jesús süpüla ouktaa saa'u waainjala, taashishii waya süpüla

arütkawaa nüna'inmüin Maleiwa süka jutatüitpain wapüleerua tü wopukot nüma'anamüin, maa aka jutatüin paala nüpüleerua chi sacerdote judiokai süpüla ekerolaa sulu'umüin tü paü shiinalu'usükat kanülüiakat “Nümülatu'u Maleiwa”. Süttüsü paala woulia suulia warütkaain nüma'anamüin chi Maleiwakai, maa aka süttüin tü paü shiinalu'ujatkat suulia wayuu sütüma tü kuluulu sütaüjjakat. Otta müshia joolu'u, ouktüichipa Cristo süpüla wekerolüinjanain nüna'inmüin Maleiwa süpüla katüinjatüin wo'u. ²¹Je Cristo, chi sacerdote mülo'ushikai, shiimüin süna'in anashaatain, je niaichipain laülaain wapüleerua wayakana na nüpüshikana chi Maleiwakai. ²²Je süna'injee süpüshua tü kasa anasü naa'inrakat Cristo, anakaja warütkaale nüna'inmüin Maleiwa sümaa nnojolüin japüliwain waya süna'in anoujaa nüna'in, nnojotsü piamainjatüin waa'in. Taashiinapa waya süpüla warütkaainjanain nüna'inmüin, süka shiimüin su'lojoonüin waainjala woulia sükajee ouktüin Cristo waa'u, suulia mojuin waa'in saalii waainjala. ²³Sümaa waküjaain sümüin wayuu süna'in wa'atapajüin tü naa'inrüinjatkat chi Maleiwakai wapüla, anakaja wachecherüle waa'in süma'inru'u nikeraajüin shia, süka watüjaain naa'u süna'in pansaain nütüiki waneepia. ²⁴Anakaja müleka wakaalijiraale wapüshua süna'in kamaneejiraale je süna'in waa'inrüin tü anasükat. ²⁵Je anakaja müleka nnojoliire müin aka waya naa'in na wayuu akulajaakana aa'in süna'in jutkatirawaa. Shia anaka alu'u müleka jutkatiraale

waya süpüla ekirajirawaa süpüla wachecherüin waa'in sünaïn anoujaa. Anakaja wachiaajiraale waneepia, süka sülü'ülüün nükalia chi Senyotkai süpüla nüle'ejüinjachin nüchikua.

²⁶Müleka masütaajule wane wayuu sünaïn naainjala süchikijee niyaawatüin saa'u tü shiimainkat nüchikikat chi Maleiwakai, nnojoleerü kasain saapüin nüümüin süpüla sülatinnüin naainjala nuulia. ²⁷A'atapeechi ne'e sümaa mmoluu seema tü ka'i kasalajaneetkat o'u tü aainjalaakat. Aja'lajaaeerü tü nü'ünüükalüürua chi Maleiwakai so'u ka'ikat tia süka wane siki chuwatashaanasü. ²⁸Nnojo motüin jaa'in nakuaippa na watuushi judíokana paala sümaiwa. Müleka masütaajule wane wayuu sünaïn ayouktaa tü nuluwataakat anain Moisés, je müleka süküjüle wayuu piama je apünüin nüchiki sünaïn natüjaain naa'u sünaïn kaainjalain chi wayuukai, nnojoiüpü'üshi amülijajünüin. O'utinnapü'ü aa'inchi. ²⁹Je maa'ulu yaa, ¿jameechi chi eekai ni'rüin wayümüin nüümüin chi Nüchonkai Maleiwa? ¿Jameechi chi eekai nnojoliün kasajatüin nüümüin tü nüsha Cristo amülakat süpüla süla'ajaantüin saainjala wayuu saashin tü pütchi e'itaanakat wapüla nütüma Maleiwa? ¿Jameechi chi eekai mojuin nüünüiki nüümüin chi Naa'inkai Maleiwa anamiakai ma'i? Alana'aleejeeria ma'i sünaïn mojuin tü süsalajeejatkat nüümüin suulia tü alatakat nüümüin chi judío kaainjaraikai paala sümaiwa. ³⁰Soto jaa'in tü nümakat chi Maleiwakai sünaïn nüümüin: "Shiimüin sünaïn mülieenain jia tatüma saaliijee tü kasa mojusü

jaa'inrapü'ükat". Mataalashi joo nia'aya: "Jia tachonniikana, kasalajaneerü jümüin jaainjala tatüma". ³¹Kato'uchi chi Maleiwakai, je müleka süta'ünnüle wane wayuu nütüma, ayo'ujaajeerü ma'i saa'in sümaa mmoluu neema.

³²Tawalayuwaa, soto jaa'in jukuaippa paala jikeroloiwa'aya sünaïn anoujaa. Watta saalin tü müliaa jülatirakat so'u ka'ikat tia saaliijee tü jünoulakat. Mayaainje ji'rüin müliaa, achechetshii jia jaa'in sünaïn anoujaa. ³³Eeshii wane juwalayuu eekai mee'erapalain su'upala wayuu sümaa ne'rüin müliaa sütüma wayuu. Otta jia eekana nnojoliün ne'rüin müliaa, jümülijajüin ma'i naya. ³⁴O'unüshii jia nanainmüin na eekai püreesain süpüla jümülijajüinjanain naya. Otta jiaakana jüpüshua, wanaa sümaa shime'raanüin aa'u tü jükorolokot sütüma wayuu, ayatsia talatüin jaa'in nümaa Maleiwa, süka jütüjaain saa'u sünaïn saapüneerüin jümüin tü nüküjakat achiki paala jümüin sünaïn pansaain nüünüiki. Je tü naapeetkat jümüin, alana'aleesia ma'i sünaïn anain suulia tü jükorolo amülouikat.

³⁵Anakaja joolu'u ayatüle jüchecherüin jaa'in sünaïn anoujaa sümaa nnojoliin mmoliün jia seema tü müliaa ji'rakat, süka shiimüin saapüneerüin jümüin sünaïnjee tü jünoulakat süpüshua tü kasa anasü nüküjakat achiki chi Maleiwakai.

³⁶Anakaja nnojorule juu'ulaain suulia anoujaa. Müleka jüchecherüle jaa'in süma'inru'u ja'atapajüin tü naa'inrüinjatkat chi Maleiwakai jümüin, juunteerü jaa'inrüin tü nüchekakat jüpüleerua, je naapeerü jümüin tü nüküjakat achiki

sümaa pansaain nüüüiki. ³⁷Soto jaa'in tü ashajuushikat sulu'u tü nüchikimaajkatkai chi Maleiwakai:

“Shiimüin sünnain
nüntamaatajachin chi
antajachikai.

³⁸ Je kateerü no'u na tachonnii
aa'inrakana tü tachekekak
napüleerua.

Otta chi eekai niyouktüin tü
nünoulakat,
mojeerü ma'i taa'in nümaa”.

³⁹Wayakana, nnojoliishii wayain
na oo'ulaakana suulia anoujaa
süpüla amüloulii. Waya na wayuu
achechetkana naa'in sünnain anoujaa
süpüla o'tte'ennaa nütüma.

Nachiki na wayuu kanoulakana paala

11 ¹Süka tü wanoulakat,
atüjaashii waya naa'u chi
Maleiwakai sünnain naa'inrüinjatüin
tü kasa anasü nüküjakat achiki
wamüin. Wayaawatüin sütüma
sünnain shiimüin tü kasa me'rujukat.
²Soto jaa'in sünnain talatüin ma'i
naa'in chi Maleiwakai namaa na
watuushikana paala sümaiwa
müleka nanoujale waneepia tü
nümakat namüin.

³ Je süka tü wanoulakat,
wayaawata aa'ulu sünnain
sükumajuushin sümaiwa tü mmakat
je tü jolotsükalüürua süpüshua süka
nüüüiki chi Maleiwakai. Tü kasa
we'rakat maa'ulu yaa, aainjuushi
nütüma süka tü kasa nnojotkat
e'nnüin paala.

⁴Ekirajüntüshii waya maa'ulu
yaa sünnain tü anoulaakat sütüma
nüchiki Abel, mayaashije
kaka'iyachin ouktüin. Shiimüin
sünnain kanoulain nia nünain
Maleiwa. Je süka nünoujain nünain,
nüsülajüin nüümüin tü talatakai

atüma naa'in. Je sükajee tia, müshi
chi Maleiwakai nüümüin: “Pia
aa'inraka tü tachekekak püpüleerua”.
Otta sümaa tü nüsülajakat Caín, chi
nipayakai, nnojoiishi talatüin nia.

⁵Otta paala sümaiwa Enoc,
nnojotsü ni'rüin ouktaa. Süka
shiimüin nünoula nünain
Maleiwa, asaajaanüshi nütüma
sa'akajee tü wayuukolüürua yaa
mmolu'ujee, nnojoiikalaka nüntüna
anain sütüma wayuu süchikijee
tia. Sütüma tü ashajuushikat
sulu'u tü nüchikimaajkatkai chi
Maleiwakai, watüjaa aa'uchi Enoc
sünnain nünoujain. Nnojoliwa'aya
nüsajaanüin Enoc sa'akajee
wayuu, talatüsü naa'in chi
Maleiwakai nümaa. ⁶ Je maa'ulu yaa,
kamaeeshi chi Maleiwakai namüin
na eekana nümaain saa'u nanoujain
nünain sünnain niain Maleiwain. Otta
nnojotsü talatüin naa'in namaa na
manoujainsaliikana.

⁷Otta Noé paala sümaiwa, süka
shiimüin nünoula nünain Maleiwa,
oonooshi sümaa tü naapirakat achiki
nia soo'opünaa tü kasa alateetkat,
tü nnojotkat sütüjaain aa'u wayuu.
Süka noonooin sümaa nüüüiki,
nükumajakalaka wane anua
kalu'uinjatkat tü nüpüshikalüürua
süpüla su'tte'ennüinjatüin. Tü kasa
anasü naa'inrakat Noé sünnainjee
tü nünoulakat, suturaajaain
tü kasa mojusü saa'inrakat tü
wayuukolüürua süpüshua. Je Noé,
süka nünoujain nünain Maleiwa
sünnain naa'inrüin tü nüchekakat
nüpüleerua, anajiraaichipa nia
nümaa süpüla ka'ikat süpüshua.

⁸Otta paala sümaiwa Abraham,
süka shiimüin nünoula nünain
Maleiwa, naapaain nüüüiki wanaa
sümaa nüjütüntüin nütüma sulu'ujee

nuumain sulu'umüin wane mma naata aapünajatkat nümüin nütüma Maleiwa. Mayaasüje nnojölüin nütüjaain saa'u Abraham jalainjachin no'otüin, ayatshia o'unüin. ⁹⁻¹⁰Je nüntapa sulu'umüin tia mmakat, kepiashi nia sulu'u maa aka wayuu naatajatü, mayaainje pansaain nünüiki Maleiwa sünain saapünüinjatüin tü mmakat nümüin. Süka kanoulain nia, talatüsü naa'in sünain kepiayaain kuluulu ne'e, süka nütüjaain naa'u chi Maleiwakai sünain nükumajüinjatüin nüpüla wane pueulo kepiainjachikat alu'u nia cha'aya iipünaa nümaa, wane pueulo matüjainsat ojuttaa. Akaajaa ne'e Isaac oo'ulaka Jacob, kepiayaashii kuluulu, mayaasüje pansaain nünüiki chi Maleiwakai sünain saapünajatüin tü mmakat namüin.

¹¹Mayaainje laülaachoin ma'i Abraham süpüla kachonwaa, je maralüin Sara, tü nu'wayuusekat, nünoujain tü nümakat paala Maleiwa nümüin sünain pansaain nünüiki. Je saa'ujee nünoujain Abraham, kachonshii naya laülaalu'u. ¹²Sükajee nünoula chi waneeshikai wayuu, watta ma'i saalii tü nuu'uliwo'ukalüirua mapa, mayaashije laülaain nia süpüla kachonwaa. Isasü süchiki ayaawajünaa, maa aka isain achikii shiyaawajünüin tü jolotsükalüirua chakat iipünaa je tü jasai sotpünaajatkat palaa.

¹³Je na wayuu taküjüinapakana achiki jümüin, pejepa naya süpüla ouktaa, naashajaa achikit sümüin wayuu sünain naatajanain naya yaa saa'u tü mmakat. Mayaasüje maapuüin namüin tü nüküjakat achiki paala chi Maleiwakai sümaa

pansaain nünüiki, ouktüshii naya sümaa talatüin naa'in sünain anoujaa, süka nanoujain sümaa naa'inrüinjatüin chi Maleiwakai shia so'uweena wane ka'i. ¹⁴⁻¹⁵Na wayuu makana anüiki, watüjaa aa'uchii sünain moumain. Achajaashii süchiki wane mma jeket eenjanale kepiain naya. Male'ejüinsaliijase naya nachikua cha'aya sulu'umüin eejee paala nojuittinnüin. ¹⁶Tü naashajaakat achiki, shia wane noumain alana'aleekat sünain anain suulia tü kepiapü'ukat alu'u paala naya. Jülüjasü naa'in wane noumain jeket, tü chakat iipünaa nüma'ana Maleiwa. Je nikeraajüin tia noumainkat napüla süka nnojoliin japülin naya sünain niain Namaleiwasein.

¹⁷⁻¹⁸Otta Abraham, wanaa sümaa nuu'ulakünüin aa'in nütüma Maleiwa müleka shiimüinre tü nünoulakat nünain, naapaain nünüiki Maleiwa sünain naapüinjachin Isaac nümüin süpüla ouktajachin, chi waneeshikai nüchon, chi aküjünakai achiki paala nümüin nütüma Maleiwa sünain pansaain nünüiki nümüin sünain maa: "Tü puu'uliwo'ukalüirua, nanainjeeinjateerü na nükieuukana Isaac". Je wanaa sümaa nünoujain Abraham nünain Maleiwa, nu'utüinjachia aa'in waneepia chi nüchonkai ¹⁹süka nütüjaain aa'u sünain nuuntuin Maleiwa nüso'irüin saa'in wayuu eekai ouktüin. Je chi Maleiwakai, na'alijirtüin nuulia Abraham nu'utüinjachin naa'in chi nüchonkai. Mataashi maa aka nüso'innakai aa'in nümüin nüchikua. ²⁰Otta Isaac, süka shiimüin nünoula nünain Maleiwa, pansaasü nünüiki sünain nüküjain namüin

na nüchooinkana Jacob oo'ulaka Esaü süchiki tü kasa anasü naa'inrüinjatkat chi Maleiwakai naka so'uweena wane ka'i.

²¹Otta Jacob, pejepa süpüla ouktaa je süna'in nüsha'walaain süka tü nuwaraaratsekat süna'in nu'waajüin Maleiwa, süka shiimüin nünoula nüna'in, pansaasü nünuiki süna'in naapirüin José chi nüchonkai süchiki tü kasa anasü naa'inrüinjatkat chi Maleiwakai so'uweena wane ka'i naka na nüchooinkana José.

²²Otta José, pejepa süpüla ouktaa, süka shiimüin nünoula nüna'in Maleiwa, naashajaakalaka nachiki na Israelkana süna'in najuittinnüinjanain so'uweena wane ka'i sulu'ujee tü mmakat Egipto. Nüküjaleein namüin tü naa'inrüinjatkat süka tü niimsekat no'unapa.

²³Otta chi nüshikai je tü niikat Moisés, nanujülüin nia süchiki jemelin so'u apünüin kashi suulia o'utinnaa aa'in nütüma chi sülaülakakai mma, süka ne'rüin chi nachonkai süna'in anashichoin nia je nnojoliishii mmolüin seema tü nuluwataakat anain chi sülaülakakai mma.

²⁴Otta miyo'upa Moisés, süka shiimüin nünoula nüna'in Maleiwa, niyouktüin süpüleerua ayataa süna'in süchonyaain nia tü nüchonkot chi sülaülakakai mma. ²⁵Anasü saa'in nüümüin müliajiraain namaa na nuwalayuu nüpüshikana Maleiwa suuliale'eya talataa aa'in palit juya sa'aka kaainjalaa. ²⁶Süka jülüjüin naa'in Moisés waneepia tü kasa anasü naapeetkat chi Maleiwakai nüümüin so'uweena wane ka'i, anasü saa'in nüümüin e'nnaa amüin

saaliijee niain nüpüshin Maleiwa. Nütüjaa aa'ut süna'in shiain tü wayuukolüirua nünteetka a'akajee chi Nüneekajalakakai Maleiwa. Je mayaasüje ni'rüin müliaa maa aka müliainjachin chi Nüneekajalakakai Maleiwa, alana'aleesia ma'i shia süna'in anain suulia tü washirüü Egiptoje'ewatkat aapünapü'ukat nüümüin. ²⁷Je saa'ujee tü nünoulakat, ajuittüshi sulu'ujee Egipto. Nnojoshi sükajeejachin mmoluu seema naashichin chi sülaülakakai mma, shia süka jülüjain naa'in waneepia chi Maleiwakai, mayaashije nnojolin ni'rüin. Jülüjasü naa'in tü naa'inrajatkat chi Maleiwakai so'uweena wane ka'i, sümaa nüchecherüin naa'in süna'in anoujaa süma'inru'u na'atapajüin shia.

²⁸Otta süka nünoujain Moisés, süpülapünaa najuittinnüin, nuluwataain na Israelkana süna'in natülüittirüinjatüin süsha anneerü sotpünaa so'u tü nepiakat suulia nüntajüin nanainmüin chi aapiee ajütünakakai nütüma chi Maleiwakai süpüla o'utaa naa'in na tooloyuu e'irumaakana cha'aya Egipto. Shia e'nnaajünaka maa'ulu yaa süka "Pascua" münüin.

²⁹Otta na wayuu Israelkana, süka shiimüin nanoula nüna'in Maleiwa, nountüin nalatüin pasanainpünaa süna'in tü palaakat maa aka soo'opünaa mma jososü, tü kanülüiakat Palaa Ishosü. Otta tü surulaat Egiptoje'ewatkalüirua, nnojotsü nountüin nalatüin. Kettüshii naya, shimiralüin tü palaakat.

³⁰Otta na judíokana, süna'injee tü nanoulakat, naa'inrüin tü nuluwataakat anain Maleiwa süna'in naleeyalüinjatüin süsepo'upünaa tü

pueulokat Jericó kepiakana alu'u na na'ünüükana. Je süka shiimüin nanoula nünain chi Maleiwakai, kettaapa tü akaratshisükat ka'i, ojunnajaasü tü süsepkat süpüla nekerolüinjanain sulu'umüin.

³¹Otta Rahab tü wayuu maa'insatkat, kamaneesü shia namüin na judfo ajayajushiikana sünain sunujulüin naya. Süka shiimüin sünoula nünain Maleiwa, nnojotsü o'utünüin aa'in wanaa namaa na wayuu kepiakana a'aka, na manoulakana nünain Maleiwa.

³²Eesü süpüla taküjain soo'omüin jümüin. Akatsa'a suulia kama'ajeechin taya sünain, taso'ireena aa'in jia joolu'u sünain nachiki na anoujashiikana maa aka Gedeón, Barac, Sansón oo'ulaka Jefte, makai aka David, Samuel oo'ulaka na nünüikimaajanakana chi Maleiwakai. ³³Sükajee tü nanoulakat, nayamülüin tü na'ünüükalüüria süpüla nasütüin suumain suulia. Je naa'inrüin tü anasükat sümüin tü wayuu laülaakana aa'u naya. Ekerajüsü tü nümakat chi Maleiwakai namüin sünain pansaain nünüiki. Ja'itaina ojütünüin sütüma tü na'ünüükalüüria sa'aka kalaira, nüsürülüin saanükü chi Maleiwakai. ³⁴Ja'itaina ojütünüin so'u siki, nnojoliishii jotüin sütüma. Ja'itaina ashütünüin aa'u süka chajaruuta, nalatirüin noulia. Mayaainje matsüin naya, katsüinshii nütüma Maleiwa süpüla na'walakajüin tü na'ünüükalüüria.

³⁵Otta wane jeyuu sünainjee shiimüin nanoula nünain Maleiwa, aapünüshii na napüshikana namüin sümaa kataa o'u süchikijee o'utünaa aa'in. Oo'ulaka wane

wayuukana, nnojoliishii taashin sütüma tü na'ünüükalüüria, süka nnojoliin noo'ulaweein suulia tü nanoujakat anain. Je süka masütaajuin naya sünain nanoula nünain chi Maleiwakai, ouktüshii naya sütüma a'yaatünaa natüma na na'ünüükana. Nnojotsü nayouktüin anoujaa, süka natüjaain saa'u sünain süso'iraa'injatüin naa'in so'uweena wane ka'i sümaa alana'aleeinjatüin sünain anain nakuaippa süchikijee. ³⁶Eeshii eekai mee'erapalain sümaa na'yaatünüin. Püreesashii naya sümaa kapüin süka kaleena. ³⁷Eeshii eekai no'utünüin aa'in sümaa na'ina'annüin süka ipa. Eeshii eekai ouktüin sükajee shi'yotoonüin nase'eru'upünaa. Eeshii eekai o'utünüin aa'in süka chajaruuta. E'rünna amüinchi sütüma tü manoujainsatkalüüria. Süka müliain ma'i na anoujashiikana, a'atüshii süta anneerü je süta kaa'ula nanain. ³⁸Waraitta'ain müshii naya sainküin isashii je saa'upünaa wutai sümaa natunkapü'üin sulu'upünaa ipa je sulu'upünaa yoroloma. Mayaainje wayuüin anashii naya, kanainshi'iyaa ne'e saa'in tü manoujainsatkalüüria. ³⁹Mayaainje talatüin ma'i naa'in chi Maleiwakai namaa na anoujashii taküjaitpakana achiki jümüin, sünain ayatüin naya sünain anoujaa su'unnaa tü müliaa ne'rakat, nnojotsü aapünüin namüin süpülapünaa ouktaa tü nükjajakat achiki paala chi Maleiwakai sünain pansaain nünüiki namüin. ⁴⁰Süka jamüin, nüchekalaka chi Maleiwakai, shia saapünüinjatüin tia namüin wanaa wamaa. Kettaaitpa joo tü nüchekakat chi Maleiwakai napüleerua nayakana je wapüleerua wayakana süpüla warütkaainjanain

wapüshua nünainmüin nünainjee Cristo. Alana'alesia ma'i tü kasa aapünakat wamüin joolu'u süinain anain suulia tü kasa aapünakat paala namüin.

12 ¹Süso'irüitpa waa'in nachiki na watuushikana süka nachecherüin naa'in süinain anoujaa su'unnaa tü müliaa ne'rakat. Je joolu'u müitpain tü nanoulakat, anakaja müleka masütaajule waa'in wane'ewai wakua süinain waa'inrüin tü nüchekakat Maleiwa wapüleerua su'unnaa tü müliaa we'rüinjatkat. Süpüla wachecherüinjatüin waa'in, acheküsü woo'ulaa'injatüin suulia waainjala oo'ulaka suulia tü kasa eekai ein isakat atüma wachiki woonooin sümaa nünüiki Maleiwa. ²Shia anaka alu'u müleka jülüjale waa'in Jesús waneepia. Na watuushikana, nachecherüin naa'in süinain anoujaa süka natüjaain saa'u süinain nünteechin Cristo, chi Nüneekajalakai Maleiwa, so'uweena wane ka'i. Je wayakana maa'ulu yaa, anakaja müleka wachecherüle waa'in su'unnaa müliaa maa akaapü'tü nayakana, süka eechipain Jesucristo wamaa. Nnojotsü niyouktajaain amaa ouktaa saa'u tü kuruusakat mayaasiije nütüjaain saa'u mee'erapaleechin nia süinainjee. Nütüjaa aa'ut süinain talatüinjatüin ma'i naa'in Maleiwa nümaa süchikijee. Je maa'ulu yaa, shiimüin süinain nuluwataain wanaa nümaa chi Maleiwakai, süinain joyotüin nia nikialu'tjee süinainjee kojutüin ma'i nütüma. ³Anakaja sotüle jaa'in tü müliaa nülatirakat Jesús wanaa sümaa niyouktünüin sütüma wayuu kaainjarat e'rütakat wayumüin nümüin. Anashii müleka jülüjale jaa'in Jesús, suulia

malainjain jaa'in süinain anoujaa su'unnaa tü müliaa ji'rakat müinma'a.

Ekirajünüshii waya nütüma Maleiwa süka tü müliaa we'rakat

⁴Jiakana, süinain ja'alijirüin jukuaippa suulia aa'inraa tü mojusü nachekakat jüpüleerua na wayuu kaainjaraliikana, ja'itairü ürüttüin naa'in jünain, nnojoliiyülia jia ouktüin natüma saaliijee tia. ⁵Sükajee jiain nüchonnii Maleiwa, nnojo motüin jaa'in tü pütchi ashajünakat paala sulu'u tü karaloukta nüchikimajatkat süpüla süchecherüinjatüin jaa'in:

“Tachee, ee mmata paa'in nikirajapa pia chi Maleiwakai süinain tü kasa anasükat süpüla paa'inrüinjatüin je tü mojusükat süpüla piyouktüinjatüin. Je müleka paa'inrüle kasa mojusü, nnojo alin pümüin müleka nüchiajaale pia saaliijee.

⁶Tü wayuu eekai shiimüin süinain alin nüpüla Maleiwa, ekirajünüsü nütüma süinain tü anasükat süpüla saa'inrüinjatüin. Je müleka saa'inrüle tü mojusükat, süsalasü nütüma süpüla nünouktüinjatüin sukuaiippa süka nüchoin”.

⁷Jüchechera jaa'in süpüla tü müliaa ji'rakat sütüma tü wayuu manoujainsatkalüirua. Sükajee tü müliaa ji'rakat, kalio'ushii jia nütüma chi Maleiwakai. Je süinainjee tia, jütüjaa aa'ut süinain jiain nüchonnii chi Maleiwakai.

¿Jarai chi achonlu nnojoikai kalio'uin nütüma nüshi? ⁸Atüjeeshii nütüma chi Maleiwakai napüshua na nüchooinkana süka tü müliaa ne'rakat. Müleka malio'uleje nütüma Maleiwa, nnojoliija jia nüchooin. Wayuuja ne'e ojunalaa jia. ⁹Soto jaa'in nakuaippa na washikana yaa mmolu'u. Ja'itaichii kalio'uin waya natüma, ayatshii jüüjüüin waya namüin je kojutüshii naya watüma. Shialeeka nümüin chi Washikai Maleiwa chakai iipünaa, alana'aleesia ma'i süna'in anain müleka jüüjüüle waya nümüin süpüla eeinjanain waya nümaa joolu'u je süpüla ka'ikat süpüshua.

¹⁰Kalio'upü'üshii waya tepichiiwa'aya natüma na washikana, süka kee'ireein naa'in tü anaakat wapüleerua. Akaajaa tü kee'ireekat naa'in chi Maleiwakai wapüleerua süka tü müliaa we'rakat, shia aneein waya sükajee tia. Tü nüchekakat wapüleerua, shia süka müinjanain aka waya naa'in süpüla ka'ikat süpüshua. ¹¹Je süma'inru'u nikirajüin waya chi Maleiwakai süka tü müliaa we'rakat, nnojotsü kalu'uin talataa aa'in wamüin, mojusü waa'in sütüma. Otta so'uweena wane ka'i, walatitpeena tü müliaakat, “Tü alatakak wamüin paala, kalu'usü anaa”, wameerü süka saapüneerüin wamüin jutataa aa'in sümaa wountüin waa'inrüin waneepia tü anasükat sümüin wayuu.

¹²⁻¹³Je joolu'u süka teme'ejüitpain jaa'in, anakaja müleka sotüle jaa'in tü juwalayuukolüirua eekai malain naa'in süna'in anoujaa. Jükaaliijiraa jümaala jüpüshua süpüla süchecherüinjatüin jaa'in. Anakaja müleka lotüle jia süna'in anoujaa

napüleerua na juwalayuukana süpüla katsüinjatüin naa'in nachikua suulia noo'ulaajüin suulia anoujaa.

Achiajaanüshii na manoujainsaliikana

suulia ayatüin süna'in ayouktaa

¹⁴Ee jümata jaa'in nanain na juwalayuukana jükaaliijiraa süpüla jutatüinjatüin jaa'in jüpüshua. Jaapa jümaala jukuaippa nümüin chi Maleiwakai waneepia saa'ujee jükatannüin joolu'u suulia kaainjalaa. Chi eekai nnojolin nükatannüin suulia naainjala, müichia nnojolin ni'rüin chi Senyotkai. ¹⁵Ee jumata jaa'in süpüla jüchecherüinjatüin naa'in chi juwala eekai malain naa'in ja'aka, chi oo'ulaweekai suulia anoujaa nüna'in chi Maleiwa anamiakai. Anakaja jüchiajaale chi eekai masütaajuin süna'in kaainjalaa suulia nashatüin na nuwalayuukana tü mojusü naa'inrakat sümaa amalaja'in tü nanoulakat sütüma. ¹⁶Je anakaja müleka jüchiaajiraa suulia a'luwajirawaa akuaippaa sümaa wayuu jierü otta wane jierü nümaa wane toolo suulia ki'rajüin jia süna'in tia. Otta chi eekai nnojoliin jamajatüin nümüin tü nüchekakat chi Maleiwakai nüpüleerua, anakaja müleka jime'ejüle naa'in süpüla kojutüinjachin Maleiwakai nütüma nüchikua, suulia majüin aka naa'in Esaú paala sümaiwa süna'in nuikküin sujut e'irumaa saa'u eküülü ne'e. ¹⁷Watüjaa aa'uchi nia süna'in isain ma'i naa'in süchiirua süchikijee tia. Ja'itaichi a'yalajüin ma'i, nnojotsü nuuntüin nu'wanajüin tü naa'inrakat. Achuntüshiyaaje nümüin chi nüshikai shii'iree nükjainjatüin nümüin süchiki

tü kasa anasü anteetkat nümüin sünaïnjee e'irumawaa, müichia nnojolin kojutüin atümaa maa aka nujut wane eekai e'irumaain.

¹⁸Nnojoliishii antüin jia nünainmüin chi Maleiwakai maa aka nantüin nünainmüin na wayuu Israelkana paala sümaiwa cha'aya eere wane uuchi kanüliakat Sináí, eejatüle süpülajain sümaa süchuwajaain je sümaa kojoin ma'i tü sirumakat je sümaa kayaaïn. ¹⁹⁻²⁰Je wanaa sümaa emetutpa shi'ira wane jontoroyoi, aapünüsü nünüiki chi Maleiwakai sünaïn maa: “Müleka so'otoole wane wayuu je wane mürüt ne'e soo'omüin tü uuchikat, o'utinnajatü aa'in süka ipa”, müshi nia. “Nuu'ulaachon numata joolu'u suulia aashajawaa”, müsü tü wayuukolüirua, süka shiimoloojooïn ma'i saa'in sütüma tü saapakat. ²¹Akaajaa Moisés sünaïn mmolüin. “Tüntüsü ma'i taa'in sümaa mmoluu”, müshi.

²²Alu'ujasa jiakana, chi jüntakai anainmüin maa'ulu yaa, nia Maleiwa eere nuluwataain chaa iipünaa. Nnojoliishii antüin jia sünaïn müin wane uuchi maa aka paala na jutuushikana. Anashaatasü ma'i cha'aya, müsü aka saa'in Jerusalén sünaïn anain. Antüshii jia nünainmüin chi Maleiwakai katakai atüma so'u wayuu, eere jutkatüin wane aapieeirua wattakat ma'i saalii sünaïn ee'irajaa süka talatüin ma'i saa'in. ²³Antüshii jia na'akamüin na nüchooinkana Maleiwa, na ashajünakana anülia cha'aya iipünaa saa'u nayain nüpüshin Maleiwa je saa'u müin aka nujut wane e'irumaa naya. Antüshii jia nümülatu'müin chi Maleiwakai chi süsouktüinjacheechikai amüin

wayuu süpüshua saa'ujee tü saa'inrapü'ükat, maa aka anale je mojule. Antüshii jia na'akamüin na juwalayuu ouktakana, sünaïn keraaitpain naka süpüshua tü nüchekakat paala Maleiwa. ²⁴Antüshii jia nünainmüin Jesús chi keraajakai atüma tü pütchi jeket e'itaanakat nütüma Maleiwa, chi amülakai asha sünaïn ouktüin waa'ujee süpüla saapünüinjatüin wamüin tü nümakat paala chi Maleiwakai sünaïn pansaaïn nünüiki. Tü nüshakat Cristo amülakat waa'u süpüla süla'ajaain waainjala woulia, alana'aleesia ma'i shia sünaïn anain suulia tü nüsüljakat Abel nümüin chi Maleiwakai.

²⁵Je sükajee tia, jalia jia jüpüshua suulia jiyouktaja'alüin tü nuluwataakat anain jia chi Maleiwakai. Maa aka no'utinnüin aa'in na watuushikana sütümajee nayouktajüin nünüiki wanaa sümaa nüchiajaain naya cha'aya saa'u uuchi, akaajaa wayakana maa'ulu yaa müleka wayouktajüle nünüiki nüchiajaapa chajee iipünaajee eere nuluwataain, miyo'uleejeeria ma'i süsalajana wamüin nütüma. ²⁶Akutkujaasü tü mmakat paala sütüma nünüiki chi Maleiwakai chajee saa'ujee tü uuchikat. Je joolu'u maa'ulu yaa, pansaaïtpa nünüiki wamüin sünaïn: “Akutkujaajeerü tü mmakat süchikua tatüma, je amojujaajeerü sukuaïppa tü jolotsükalüirua süpüshua wanaa sümaa”, sünaïn nümüin. ²⁷Je tia pütchi “süchikua” makat, aküjünüsü wamüin süpüla watüjaain saa'u sünaïn sükutkujaajeerüin nütüma süchikua süpüshua tü kasa nüikumajalakat paala sümaiwa. Je aja'lajaajeerü shia nütüma. Otta

tü kasa matüjainkat akutkujawaa, müiria nnojoliün aja'lajaain.

²⁸⁻²⁹Shiimüin sünaïn pülashin chi Maleiwakai süpüla saja'lajaainjatüin nütüma kasa süpüshua, maa aka saja'lajaain kasa süpüshua sütüma wane siki. Je sükajee tia, anakaja kojutüle nia watüma sümaa waa'inrüin tü talatakak atüma naa'in. Je anakaja müleka waapüle analu'ut nümüin sümaa wa'waajüin nia waneepia, süka waneekuushin nütüma süpüla waluwataainjanain wanaa nümaa so'uweena wane ka'i.

Aso'innaa aa'in sünaïn tü nüchekakat Maleiwa

13 ¹Anakaja müleka ayatüle jia sünaïn aijiraain jüpüla jüpüshua süka pawalaawajiraain jia sünaïnjee anoujaa nünain Cristo. ²Anakaja müleka kamaneere jia sümüin wayuu antakat sünaïn ji'iyouin jipialu'umüin ja'itairü nnojoliün ji'raajüin. Ja'itashi wayuüin ne'e saa'in jümüin chi ji'iyoukai so'u wane ka'i, eeshi süpüla waneein aapiee nüma'anajeejachi Maleiwa. ³Anakaja müleka jükaaliijale na wayuu eekai püreesain, müinjana aka püreesakai jia wanaa namaa. Je tü wayuukolüirua eekai müliain, anashii müleka jümüliajüle naya, müinjana aka müliajiraakai jia wanaa namaa.

⁴Anakaja müleka kojutule jütüma jüpüshua sukuaiippa ka'wayuusee. Je jia ka'wayuusekana, kojut jütüma na ju'wayuusekana. Kasalajaneerü nütüma chi Maleiwakai naainjala chi wayuu eekai nüma'üjaain sümaa wayuu nnojotkat nu'wayuusein otta nnojoiakai su'wayuusein, je naainjala chi wayuu a'luwajiraakai nukuaippa

sümaa wayuu jierü otta wane jierü nümaa wane tooo.

⁵Anakaja müleka nnojoliire kee'ireein jaa'in washirüü. Shia anaka alu'u müleka talatüle ne'e jaa'in wane'ewai jukua sümaa tü eekai ein jüma'ana, sükajee nümüin wamüin chi Maleiwakai:

“Nnojoleechi taya o'unüin jüma'anajee.

Nnojoleena tapütüin jia jümüiwa”.

⁶Je joolu'u saa'ujee ein chi Maleiwakai waneepia wamaa, anasü müleka wachecherüle waa'in nünain süpüla müinjatüin wanüiki sümüin wayuu:

“Nia teenakaka chi Maleiwakai süpüla nükaalinjain taya.

Nnojoleechi taya mmolüin seema tü saa'inreetkat tü ta'inüükolüirua”.

⁷Motojoyoo jaa'in na wayuu mülo'ushiikana jüpüleerua, na aküjakana paala nüchiki chi Maleiwakai jümüin. Jülüja jümata jaa'in tü nakuaippapü'ukat süpüla juushikajaain nachüirua, kataiwa'aya no'u ja'aka oo'ulaka ouktapa naya, süpüla müinjanain aka jia naa'in.

⁸Eesü wane pütchi aküjuushi:

“Jesucristo, chi wanoujakai anain, matüjainsai a'wanajawaa.

Je tü nukuaippakat paala, müsia aka tü nukuaippakat maa'ulu yaa.

Meeria ayatüin shia süpüla ka'ikat süpüshua”.

⁹Je süka ma'wanajaanüin Jesús, anakaja müleka nnojoliire jüpütüin tü shiimain jikirajaapü'ukat anain paala suulia jüüjüin jia sümüin pütchi ne'e naatajatü, tü nnojotkat wanaawain sümaa tü nüchikikat chi O'tte'erüikai. Süka kamaneein

chi Maleiwakai wamüin, katsüinsü waa'in nütüma. Akaajaa chi jüüjüükai sümüin pütchi naatajati, süchikimaajkatkat ne'e nemi'irain na judíokana, nnojoishi akaaliijünün sütüma.

¹⁰Nakuaippa na sacerdotekana sulu'u tü a'waajüleekat yaa mmolu'u natüma na judfokana, wane sümüin suulia wakuaippa waya anoujashiikana nünain Cristo sünain wa'waajün nia saa'ujee naapajiraain nikii süpüla ouktaa saa'u waainjala. ¹¹Chi laülaashikai napüleerua na sacerdote judfokana, ekerotpü'üshi wwatua so'u wane juya sulu'umüin tü paü shiinalu'usukat süpüla naapüinjatüin süsha mürüt o'utinnakat aa'in saa'u saainjala tü wayuukolüirua. Otta tü shi'irukukat tü mürütkat, a'ajünapü'üsü anooipa'a ka'yatamüin suulia shipia tü wayuukolüirua. ¹²Müsia aka nukuaippa Jesús sünain nu'utünün aa'in cha'aya ka'yatalu'u suulia tü pueulokat, süpüla nüla'ajaainjatüin saainjala wayuu sükajee tü nüsha amülakat wanaa sümaa ouktüin nia. ¹³Je sükajee tü naa'inrakat waa'u, anakaja müleka wo'unule nünainmüin sünain wapütüin süpüshua sukuaippa tü a'waajüleekat yaa mmolu'u, mayaashijee e'rülüin wayumüin wayuu wamüin saaliijee wayain nüpüshin Cristo. ¹⁴Süka nnojolüin pueulo yaa saa'u tü mmakat kepiainjanakat alu'u waya süpüla ka'ikat süpüshua, kee'ireesü waa'in tü pueulo chakat iipünaa, matüjainsatkat aja'ttinnaa, kepiainjanakat alu'u waya so'uweena wane ka'i.

¹⁵Je wayakana, saa'u we'nnaajünün sünain anoujaa nünain Cristo, anakaja müleka

waapüle analu'ut waneepia nümüin chi Maleiwakai saa'u tü naa'inrakat Jesús, maa akaapü'ü paala na judíokana naapapü'üin tü mürütkat no'utakat aa'in nümüin Maleiwa.

¹⁶Je soto jaa'in aa'inraa kasa anasü sümüin wayuu sümaa jükaaliijiraain jüpüshua. Talateerü naa'in chi Maleiwakai sütüma tia suuliale'eya tü mürüt naapapü'üikat na judíokana paala.

¹⁷Anakaja müleka jüüjüüle jia namüin na juwalayuu laülaayuuwana jüpüleerua sümaa joonoon sümaa nanüiki, süpüla talatüinjatüin naa'in süka tü na'yataainkat. Müleka mojule naa'in saaliijee moonoon jia sümaa nanüiki, nnojoleerü kasain anasü saapiin tia jümüin. Aneekünüshii naya süpüla naa'inmajünjanain jia, je nasouktünjanain nümüin Maleiwa saa'u tü na'yataainkat.

¹⁸Nnojo juu'ulaain suulia achuntaa waa'u nümüin chi Maleiwakai. Anasü saa'in wamüin tü waa'inrapü'üikat, süka waa'inreein waneepia tü kojutkat atüma Maleiwa. ¹⁹Tachuntüin süka süpüshua taa'in süpüleerua jaashajaan nümaa Maleiwa taa'u shii'iree tale'ejünjachin tachikua maalü jünainmüin.

²⁰⁻²¹Achuntüshi joo taya jaa'u nümüin chi Maleiwa jimatakai atüma waa'in, süpüla nünouktüin jukuaippa süpüla jaa'inrüinjatüin waneepia tü nüchekakat jüpüleerua. Je sünainjee ouktüin Cristo, e'itaashi chi Maleiwakai wane pütchi süpüla nu'tte'erünjanain waya süpüla ka'ikat süpüshua. Je watüjaa aa'ut sünain pansaain tü pütchikat süka nüso'ire'erün naa'in chi Wasenyotsekai Jesucristo

süchikijee ouktaa. Otta Cristo, müshi aka naa'in wane anneetpü'ü anashaatashi ma'i süinain naa'inmajüin waya. Je süpüshua tü naa'inrakat chi Maleiwakai waka nünainjee Cristo, shia süpüla talatüinjachin nia wamaa je süpüla wa'waajüinjachin Jesucristo süpüla ka'ikat süpüshua. Amén, anashi wa'waajüle nia.

²²Tawalayuwaa, anakaja müleka eere jaa'in süinain tü palit pütchi tashajüitpakat jümüin süpüla tachiaain jia süpüla lotüin jünoula.

²³Je joolu'u, taapirüin jia süinain nujuittinnüichipain chi wawalakai

Timoteo sulu'ujee tü kaatsetkat. Müleka nüntüle maalü tanainmüin, o'oneechi nia tamaa chamüin cha'aya süpüla wo'unajaain jaa'u.

²⁴Anakaja jüsaküle na wawalayuu laülaayuukana jüpüleerua wane'ewaire nakua je na anoujashiikana napüshua chakana jümaa. Asakünüshii jia natüma na juwalayuukana yaakana wamaa sulu'u tü mmakat Italia.

²⁵Achuntüshi joo taya jaa'u nümüin chi Maleiwakai süpüla nii'iyatüin na'anasia jümüin jüpüshua.